

Armand Hessels:

Mester pidi disculpa
den nomber di gobierno
pa consecuencia di mal
gobernacion

Pagina 5

Dialuna 17 di APRIL 2023 www.bondia.com Email: noticia@bondia.com Tel: 582-7800 Fax: 582-7044 1,75 Florin

“Tur cos ta cla pa combati economia informal na Aruba”



Pagina 4

- **Posibel extraccion
di gas meymey
Aruba y Corsou**

Pagina 2

- **Fluho entre nivel di
educacion primario,
secundario y avansa
no ta optimo**

Pagina 3

- **Organisador di
concierto no a tene
cuenta cu procedura
di permiso**

Pagina 6

“Tur dunado di cuido por entrega un keho contra otro dunado di cuido na IVA”



Pagina 2



Mas cu 200 hende na Rotterdam a protesta contra lesamento pa mucha cu ‘drag queens’

Pagina 9



Republica Dominicana: Abinader ta rechasa entrada na 39 Haitiano

Pagina 11



Participa den e
Encuesta Nacional di Salud:
STEPS 2023

di cas pa cas for di maart te cu juni

Dal e paso pa bo salud!

Inspectie Volksgezondheid Aruba:

“Tur dunado di cuido por entrega un keho contra otro dunado di cuido na IVA”

Dia 04 di april ultimo, Bon Dia Aruba a publica un articulo di e dentista Hendrik Marsman, unda el a haci un denuncia publico pa cu cuido dental na Aruba. Den esaki, Bon Dia Aruba a tuma contacto cu Inspectie Volksgezondheid Aruba (IVA) pa nan duna nan banda di medaya tocante e caso aki.

Frances Rugebregt, ken ta fungi como beleids-medewerker/policy advisor di e departamento aki, a indica na redactor di Bon Dia Aruba cu “di banda di Inspectie, semper nos ta informa tur dunado di cuido cu nan por entrega un keho/notificacion por escrito contra un otro dunado di cuido si nan tin preocupacionnan tocante e calidad di cuido cu ta wordo duna. Nos tin un procedura special pa esaki.”

Ademas, el a indica cu “Marsman ta na altura di e procedura aki. Pa kehonan tocante finanzas lo mester acudi na AZV y pa kehonan tocante e registracion di un dunado di cuido pa por traha na Aruba, lo mester ta na DVG.”

Tocante e preguntanan di Marsman relaciona cu un caso penal contra otro dentista di inicialnan A.A.K, cu a tuma luga na luna di juni 2022 y cu a keda deteni pa sospecho di falsificacion y di a realiza actonan den cuido medico contra Ley di Calidad den Cuido Medico, Marsman a señala cu hopi hende ta puntra ken a haci robes den caso aki: “Pueblo mag di haya sa e investigacion di IVA tocante e caso aki di kico a bay robes y si esaki no lo pasa mas? Hopi pashent di e per-



sona aki a keda perhudica.”

Pa esaki, Rugebregt a indica cu di loke ta trata casonan andando na Inspectie, nan no por divulga informacion di esaki.

Pa un dunado di cuido por haci entrega di un keho of un notificacion contra otro dunado di cuido y señala nan preocupacion, tin un procedura special cu ta lo siguiente: Un rapport di keho of notificacion contra otro dunado di cuido ta wordo ricibi pa Inspectie Volksgezondheid caminda nan ta cuminsa e procedura y por tuma liga na un investigacion of un bishita di inspeccion. IVA ta señala cu nan semper ta considera un keho como un oportunidad pa mehora e atencion y nan intervencion ta pa traha cu tur proveedor di servicio di cuido pa mehora atencion medico.

Den e ‘Het Meldpunt IVA,

Klachtenprocedure zorgverlener tegen zorgverlener’ actualisa na october di 2022 ta indica cu Meldpunt ta e departamento den IVA cu ta monitoria e proceso di maneho pa loke ta trata preguntanan cu ta drenta, rapport y kehonan pa cuido medico, nan opina cu un miho comunicacion entre dunadonan di cuido ta conduci na un miho cooperacion y pa e beneficio di calidad na e mesun pashentnan nan ta pidi pa comunica entre otro primeramente pa asina resolve e diferenciacionnan existente, sino por usa e procedura aki.

Primeramente mester presenta e keho contra otro dunado di cuido di manera digital y manda nan via e-mail, ora esaki ta yega na IVA nan ta cuminsa un investigacion pa asina ey por compronde e problema y solucionnan posibel pa mehora atencion di cuido.

Unabes e dunado di cuido ta ser informa tocante e caso presenta contra su persona na IVA, e ta ricibi un carta di anuncio cu un resumen di e keho y posiblemente mas pregunta di IVA, ademas un contesta di e dunado di cuido por escrito y duna na IVA cu alquier otro informacion adicional.

Siguientemente, IVA ta invita ambos parti pa un entrevista si ta necesario, e keho tambe por wordo discuti entre ambos parti, pa loke ta trata e maneho di keho, IVA ta spera cu e dunado di cuido cu a wordo denuncia lo investiga minuciosamente e denuncia y duna na IVA kico ta e resultado di investigacion, ki decisionnan a wordo tuma y den ki tempo ta bay implementa e medidanan cu a dicidi.

Ora e keho ta cera, ta informa e denunciante via un

e-mail tocante e tramite di e denuncia, dependiendo di e denuncia IVA por tuma diferente decision, por ehemplo, no lo tuma medida of accion y ta cera e rapport; ta haci acuerdonan concreto entre e dos dunado di cuido y IVA cu mester cumpli y ta cera e notificacion; e dunado di cuido acusa ta ricibi medidanan di mehoracion di IVA, nan ta duna siguimento na esaki si e keho cu ta presenta un riesgo importante pa salud di e pashentnan of e dunado di cuido a surpasa su capacidad di autoridad (LBIG) of no a brinda atencion adecua (LKIG) ta bay ricibi un medida administrativo.

Dia 3 di april e dentista Hendrik Marsman a denuncia den medianan local un supuesto caso di un tecnico dental cu ta trahando como especialista, algo cu segun Marsman a bisa no ta permiti pa ley, cu ta indica cu un tecnico dental tin mester di un carta di referencia di un dentista e por haci trabou den boca.

Marsman a sigura cu e persona aki ta publica su trabounan y ta haci publicidad riba rednan social, pa locual Marsman a denunci’e caba y ta bisa cu e persona aki no a bay universidad y cu tampoco ta un especialista.

Tin ley cu ta bisa cu tecnico dental mester un orden di dentista y asina cu tin un djente den boca e no mag di traha den boca di pashent, “esey ta e ley existente y esey ta e ley cu IVA mester aplica. Nan mester tuma medida contra hende cu ta bisa cu nan tin cierto opleiding, pero IVA ta drumi.” El a bisa.

Posibel extraccion di gas meymey Aruba y Corsou



Aruba kier cuminsa dialogo cu Corsou riba un investigacion di gas, cual posiblemente ta presente bao awa entre e dos islanan.

Gobierno di Aruba ya caba ta den dialogo cu Repsol, un inversionista Spaño, segun un relato di website CuraçaoChronicle.

E compania aki a anuncia cu nan lo kier inverti mas di 200 miyon dollar pa financia investigacion tocante

extraccion di gas. Minister Glenbert Croes di Aruba a indica cu e kier continua cu e inversionista aki. Esaki ta un motibo dicon e kier dialoga cu Prome Minister Gilmar Pisas pa sondea ki oportunidad tin pa ambos isla.

“Compania Arubano di Petroleo” a tuma contacto cu e compania di gas di Corsou “Kompania di Petroli i Gas Korsou.” E resultado di e dialogo aki te ainda no a keda anuncia.

Fluho entre nivel di educacion primario, secundario y avansa no ta optimo

Den e doorlichting rapport tocante enseñansa cu a keda publica e aña aki, un di e 13 recomendacionnan di parti di e grupo di trabao ta mehoracion di e fluho entre e tiponan di educacion na Aruba.

E sistema di educacion na Aruba ta comparable na e sistema Europeo Hulandes. Educacion primario tin un duracion di ocho aña y ta dividi den educacion preparatorio, dos aña di kleuter, y seis aña di educacion basico. Despues di esey e alumnonan ta cuminsa cu educacion secundario cu ta dividi den diferente nivel y un direccion di educacion general y di orientacion profesional.

E conseho di e scol primario y e doorstroomtoets nacional cu e alumnonan ta tuma den nan ultimo aña di educacion primario, zesde klas, ta determina e nivel secundario y e direccion secundario di e alumno. Ademá algun scol secundario tin nan propio proceso y test di admision.

Mas di 70% di e poblacion local tin un diploma di nivel MAVO of inferior na esaki. Esaki ta nifica cu e educacion vocacional inferior EPB, pero tambe MAVO hopi biaha ta e nivel di salida. E fluho entre e nivelnan primario, secundario y avansa no ta optimo.

Esaki kiermen cu no semper e plan di estudio ta fit bon, of cu no ta alcanza e nivel rekeri suficientemente pa e siguiente stap. Esaki ta hiba na un fluho di salida trempa, un duplicacion y abandono provisional ariba di e promedio. E progresion den un sector tambe ta laga hopi di desea.

E grupo di trabao a indica cu na 2015, SER107 a señala diferente obstaculo den e sistema educativo di Aruba. Varios di e obstaculonan aki ta referi na e transicion den e sistema y nan lo sigui ta relevante. Un obstaculo importante den e diferente transicion den e sistema educativo di Aruba ta e diferencia di idioma di instruccion. E grupo di trabao ta considera esaki como un obstaculo crucial y a incorpor'e den un recomendacion separa.

E otro obstaculonan cu a identifica den 2015 y cu ta relaciona cu e transicionnan entre e diferente sectornan ta referi na e sistema educa-



tivo cu ta basa ariba e variante Hulandes cu hopi transicion, e polarisacion den e sistema educativo y e rekisitonan adicional di admision cu nan fiha.

Den e sistema escolar di Aruba ta dificil realisa un serie di transicion. Esaki ta referi na e transicion pa un nivel inferior of superior den un sector, pero tambe na e transicion entre otro sectornan.

E grupo di trabao ta splica cu debi na e tamaño di escala di pais Aruba, e opcionnan di estudio despues di educacion secundario ta hopi limita. Aunke EPI ta ofrece curso den cuater sector, esaki no ta comparable cu por ehempel e cantidad di opcion cu tin na Hulanda. Particularmente, riba nivel universitario, tin tiki oferta riba e isla. Como resultado, e studiantenan ta depende di otro paisnan pa nan continua nan estudio, particularmente Hulanda, y e sistema educativo a adapta como consecuencia di esaki.

Esaki, nan ta remarca, ta refleha den e idioma di instruccion cu ta Hulandes den e añanan di educacion superior, den e administracion di e examen central Hulandes y e metodonan di enseñansa, y den e diseño di HAVO y VWO, y den e hecho cu e diplomanan di HAVO y VWO ta wordo entrega pa gobierno Hulandes, ta considera nan ekivalente na e diplomanan di Hulanda pa loko ta trata admision di educacion superior.

Nivel di conexcion y plan di estudio insuficiente

Ademá di e ineficiencianan

den e sistema educativo, e grupo di trabao ta señala cu ora cu ta trata di conexcionnan den y entre e sectornan, e alumnonan no semper ta suficientemente prepara pa duna e stap na e siguiente nivel.

Por ehempel, EPB ta usa e prome aña pa eleva e nivel di Hulandes di e alumnonan cu ta drenta e scol. EPI cu ta haya un gran cantidad di alumno di MAVO y nan ta señala cu e habilidadnan profesional di e grupo aki ta laga hopi di desea y IPA ta rechasa futuro studiantenan debi na e nivel abao di wiskunde. Segun e scolnan ta existi diferencianan local den e nivel domina pa diploma similar.

Diferente rekisito di admision

Aunke e rekisitonan di admision keda wordo determina pa Minister di Enseñansa, den practica e rekisitonan di admision ta determina pa e directivanan escolar y ta ahusta esakinan anualmente.

Por ehempel, HAVO/VWO ta aplica rekisitonan di admision adicional ademá di e doorstroomtoets y e recomendacion di e scol y no semper nan ta acepta tur perfil di graduadonan di MAVO. Pa drenta MAVO e doorstroomtoets ta suficiente y EPB tin su propio examen di admision pa determina e nivel di e studiantenan.

IPA tin un examen di admision cu hopi tiki estudiante ta pasa, den 2021 solamente 14 di e 80 estudiante cu a tuma e examen a aproba esaki. Esaki tambe tabata pa motibo di 'no show'.

so e scolnan bao e mesun directiva tin biaha no tin idea di e desempeñu den comparacion cu e otro scolnan den e mesun directiva, y mucho menos den comparacion cu e promedio nacional.

Nan ta remarca cu no tin informacion cu ta intercambia referente e studiantenan cu ta cambiando di nivel of sector. E falta di informacion ta haci cu e problemanan di conexcion ta descuida y no tin incentivo pa haya un solucion pa esaki.

Pa mehora e fluho di transicion den e sistema educativo e grupo di trabao ta haci tres sub-recomendacion. E prome ta sigura cu e rekisitonan di admision ta igual pa cada sector. Mester sigura cu esakinan wordo coregi y elimina e posibilidad di rechaso individual di studiantenan entre scolnan publico.

E segundo sub-recomendacion ta e ampliacion di ofertanan di educacion pa nivel tres of incluso nivel dos, di educacion y por ultimo, e cooperacion y intercambio di informacion. E grupo di trabao ta propone un transferencia calido den cual e contacto entre e scolnan, sobre todo e alumnonan ta integra den un estructura di consulta, obligatorio desde e alumno te por lo menos educacion secundario.





Minister di Turismo, Dangui Oduber, a informa den un video publica riba Facebook cu resultado di recuperacion di turismo durante e prome trimester di aña 2023, tabata impresionante y a surpasa cifranan di aña 2019.

“Resultado di luna di maart ta impresionante, nos ta hopi contento cu e resultado di turismo pa luna di maart, pero tambe pa e prome tres luna di aña 2023,” Minister Oduber a expresa.

El a informa cu den luna di maart ultimo Aruba a ricibi 109.295 turista stayover. Esaki ta un recuperacion di 102% den comparacion cu luna di maart di aña 2019.

El a sigui splica cu nan ta usa aña 2019 como e liña di base teniendo cuenta cu aña 2019 tabata e miho aña den historia di turismo pa pais Aruba y p’esey ora nan a fiha e strategia di recuperacion di turismo nan a usa aña 2019 como e aña di referencia y pa

Cifranan pa turismo durante prome trimester di aña ta surpasa cifranan di aña 2019

yega back na e nivelnan aki, te hasta surpasa e nivelnan di aña 2019.

Pa loke ta e prome tres lunanan di aña 2023, Minister Oduber a indica cu den luna di januari tabatin un recuperacion di 105%, cu ta riba e cifra di aña 2019, den feburari tabatin un recuperacion di 105% tambe y pa luna di maart tabatin un recuperacion di 102%.

“E resultadonan aki ta sumamente impresionante pa habri aña 2023 di e forma aki, conforme e strategia, conforme e vision y e maneho cu nos ta hibando no solamente pa recupera nos turismo back, pero percura pa trece e turistanan afluente y tambe percura pa surpasa nivelnan di aña 2019,” el a remarca.

Pa loke ta e resultadonan di turismo crucero, Minister di Turismo a menciona cu pa luna di maart di e aña aki, Aruba a ricibi 114.504 turista



crucero, cifra cu tambe ta sirpasa e nivel di luna di maart di aña 2019.

El a enfatisa c e resultadonan aki ta un indicacion cu aña 2023, ta muestra di ta bay ta uno positivo pa loke ta trata industria di turismo den cuadro cu e recuperacion y entrada cu turistanan ta laga atras pa economia di Aruba

“Nos kier a gradici tur nos partnernan den turismo, tur e departamentonan cu ta atende cu turista, tur e empleadonan cu ta traha diariamente cu e huespednan y cu ta brinda un excelente grado di servicio, y danki na tur cu ta contribuyendo na un excelente resultado di nos turismo,” el a finalisa.

Minister Geoffrey Wever:

“Tur cos ta cla pa combati economia informal na Aruba”

Economia informal ta bibrando mas grandi a traves di rednan social y Aruba no ta un excepcion. Pa cu esaki, minister di Asuntonan Economico a sigura cu den proximo dianan comunidad ta bay haya sa e pasonan concreto cu su ministerio ta tumando contra economia informal, na unda hopi hende ta gana placa treciendo mercancia di afo sin paga belasting.

Riba social media por mira basta publicacion di personanan cu ta biaha na diferente pais y ta trece nan mercancia pa nan por bende esaki na Aruba sin necesidad di ta registra na Camara di Comercio, loke ta ocasionando un competencia no husto pa mercado local.

Minister Wever a informa cu na 2021 Departamento di Asuntonan Economico, Comercio y Industria hunto cu profesor Schneider, un experto renombra riba e tema di economia informal, a conduci un investigacion pa determina e grandura di e ac-



tividadnan economico den e sector informal. E investigacion a conclui cu e valor di actividadnan economico den e sector informal ta 20% di e producto interno bruto.

Basa riba e resultado aki, minister Geoffrey Wever a pidi Departamento di Asuntonan Economico, Comercio y Industria traha un plan di accion pa combati e economia informal na Aruba.



Ora ta papia di e sector informal of economia informal ta papia di actividadnan economico cu simplemente bisa no ta cumpli cu leynan existente. Esaki ta encera entre otro no ta inscribi na Camara di Comercio, no tin permiso pa haci negoshi y no ta registra na Departamento di Impuesto. Esaki ta nifica cu esnan activo den e sector informal no tin e gastonan cu esnan cu si ta cumpli cu leynan. Esaki ta crea un situacion di competencia inhusto pa companianan cu si, na e manera corecto ta cumpli cu nos leynan.

Pa combati e desaroyo aki, na luna di maart ultimo minister

Geoffrey Wever a ricibi bishita di Departamento di Asuntonan Economico, Comercio y Industria. Durante e bishita aki directora Maria Dijkhoff-Pita, Judesca Briceño y Jason Lejuez a elabora riba e plan di accion “Reducing the Aruban Shadow Economy.”

“Nos desaroyo economico ta depende grandemente di nos comerciantenan cu ta inverti y crea e cuponan di trabao y ta cumpli cu nos leynan, p’esey ta importante pa garantisca cu e punto di salida ta igual pa tur comerciante y esaki ta un plan di accion aki ta e prome stap pa combati e economia informal.” Minister Wever a sigura.

Editor
Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart

Redaccion
noticia@bondia.com

Pilar Flores (jefe de redaccion)
Angenette Figueres (jefe de redaccion)
Leo Maduro
Andreina Morillo
Raisa Morillon

Ejecutivo de Benta

sulaika.croes@cspnv.com

Sulaika Croes

Aviso y Arte

Sandra Loefloep

Lisa Tromp

Departamento Digital

Juan Luis Pinto

Administracion
accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Martin Boekhoudt
Francis Diksz

Colaboracion

Associated Press

Ret Karibense

Upload Media Aruba

Afiliacion

Sociedad Interamericana
di Prensa (SIP)

DIRECCION

Adm.: W. M. L. J. 822
Tel: 582-7888

Email: noticia@bondia.com
aruba@bondia.com
info@bondia.com

Website: www.bondia.com
Facebook: @bondiaoficial
Instagram: bondiaoficial

BON DIA ARUBA ta un corant
redacta y imprimi na Aruba y ta
obtenibel di dialuna te cu diasabra.
Ningun contenido por wordo reproduci
sin permiso di editor.

Armand Hessels:

Mester pidi disculpa den nomber di gobierno pa consecuencia di mal gobernacion

Luna pasa, Fundacion Bon Gobernacion Aruba a manda un carta na minister di Integridad, Ursell Arends, titula "Disculpa pa e consecuencianan di decadanan di gobernacion y discusion publico riba nos sistema politico." Den e carta, e fundacion ta propone pa minister di Integridad, den nomber di gobierno historicamente como institucion, pidi disculpa na pueblo di Aruba.

"E hecho cu ya caba na comienso di Status Aparte gobierno di e tempo ey a kita e control (financiero) interno, esey caba pa mi ta un muestra cu bo no tin ningun intencion pa tin control debido di bo actonan," Hessels a comenta. "Anto esey a keda, semper. Tur esey, incluyendo patronahe politico, nombramento di personal... bo ta wak cu nan 'no ta give a damn' tocante bon gobernacion."

Hessels den su carta ta detaya con mal gobernacion no solamente ta kibra confiansa di pueblo den nos institucionnan, sino tambe ta costa placa. "E ta costa nos miyones."

Mal gobernacion tin varios aspecto, entre nan, corrupcion, mal maneho financiero y nombramento politico. Y mientras cu corrupcion ta costa miyones di florin, mal maneho financiero y nombramento politico ta costa centenares di miyon pa pueblo di Aruba paga. Y esaki ta sistematico, aña tras aña. "Eynan mi problema ta bay. Desde comienso di Status Aparte, e cuestion di nombramento politico, e cuestion di mal administracion financiero intencionalmente, e cuestion di maneho di proyecto cu a bay malo, cu a costa nos cantidad di centenares di miyon. "E autonomia cu nan ta gaña di defende ta simplemente nan autonomia pa evita cu e partner mas fuerte den nos Reino, cu ta Hulanda, por taha nan di kico nan ta haciendo. E autonomia no ta na favor di pueblo di Aruba mes." Hessels ta indica cu tin hasta encuesta cu ta indica cu pueblo di Aruba mes no ta confia riba nos politiconan y si ta prefera pa Hulanda tin control riba finanzas. Algo cu nos politiconan ta prefera di tapa. "Esnan cu a afecta nos autonomia no ta Hulanda, sino nos propio politiconan cu a hiba un maneho financiero totalmente deficiente, irresponsable, y tur esey a haci cu nos como pueblo tin un debe gigantesco cu ta practicamente impagable."

Aruba na e momento aki ta paga 300 miyon florin pa aña simplemente na interes. "Anto e 300 miyon florin aki ta mas placa cu loke henter nos presupuesto di Enseñansa ta costa," Hessels ta agrega.

Den su carta, Fundacion Bon Gobernacion Aruba ta destaca con ademas di tur caso cu tin den corte relaciona cu corrupcion y mal maneho (Ibis, Avestruz, Flamingo, Diamante, Kukwisa, Kwihi y e investigacion riba ex-minister Besaril), varios investigacion y demanda a tuma lugar manera den Landslaboratorium, unda a haya cu a malversa dies miyon florin; Directie Onderwijszaken unda empleadonan a malversa fondo di beca na balor di un miyon florin, placa cu a desaparece na Enseñansa pa Empleo, y e Anglozaak – miho conoci como Vacunagate. Y esaki no ta tur pasobra segun e carta ta indica, "CAD ta descubri mal maneho den practicamente tur investigacion cu ta haci riba departamentonan di gobierno dentro di e posibilidadnan hopi limita cu tin.

Pero ademas di corrupcion, e otro aspectonan di mal gobernacion – patronahe politico, arbitrahe cu evasion di ley; toma di decision no-transparente; fayó di cumpli cu acuerdo y compromiso; falta di transparencia; mal maneho financiero y di personal; obstruccion di control y responsabilisacion; uso ilegal di poder; politica corruptivo y falta di integridad – tabatin un impacto hopi mas dañino riba Aruba. Mal gobernacion ta haci cu gobierno di Aruba nunca tin placa. Aruba a keda cu un gobierno cu consumo halto, cu a conduci na un debe nacional practicamente impagable di seis biyon florin excluyendo obligacionnan di PPP di casi un biyon florin. Pa motibo di e debe aki cu interes halto, pa decadas a haci relativamente tiki inversionnan sostenible a largo plaso pa amplia e base economico di Aruba. Ta tuma tiki medida pa reduci gasto pa contraresta e aumento casi anual den gasto, sino cu ta keda busca



fuerce nobo di entrada (esta, impuesto) pa mantene e aparato di gobierno den e forma aki. E aumento regular di impuesto ta keda kibra e poder di compra di e poblacion.

Disculpa

Mirando e daño cu e mal gobernacion structural y continuo durante decadas a haci na Aruba, e fundacion ta propone un disculpa publico di gobierno. E idea a bin mirando cu prome minister Hulandes, Mark Rutte, den nomber di gobierno Hulandes como institucion historico, a pidi disculpa pa e pasado di esclavitud den Reino.

"No ta coincidencia cu e puntonan principal di Gabinete Wever-Croes I tabata Bon Gobernacion, Transparencia y Integridad," segun e carta. E gobierno nobo na 2017 aparentemente tabata na altura cu e conceptonan aki a ser viola pa administracionnan anterior. Sinembargo, esaki no ta nifica cu no tabatin mas violacion riba e principionan aki. Al contrario, e prome Gabinete Wever-Croes a cay pa motibo di posible corrupcion di partnernan di coalicion (resultando den casonan Flamingo y Diamante), mientras hasta nan propio miembronan di partido a resulta di no tabata honesto, resultando den retiro di minister plenipotenciario y dos ex-minister den caso Kwihi."

Esaki ta e motibonan cu ta confirma e sentimiento entre nos pueblo cu corrupcion entre gobierno, incluyendo administracion, ta comun, manera ta indica den encuesta di percepcion di corrupcion di CBA. Pa e motibo aki, "ta di gran importancia pa gobierno publicamente reconoce cu e calidad di gobernacion despues di Status Aparte a faya severamente, cu consecuencianan serio y duradero (financiero y otro) pa poblacion di Aruba. E reconocimiento aki cu speransa por conduci na esfuersonan conhunto (a traves di participacion ciudadano) pa mehora e calidad di gobernacion y impulsa desaroyo positivo di nos pais," e carta ta indica.

"Di otro banda, e falta di reconocimiento y disculpa lo laga na cla cu "e politiconan" no tin intencion di cambia nan manera pa finalmente pone e interes di e poblacion na prome lugar."

"Tanten cu no tin e reconocimiento publico cu abo como gobierno – y mi no kiermen e gobierno aki, aunke mi ta kere si cu ainda tin cosnan indebido ta pasando – no reconoce loke a tuma lugar structuralmente, e ora nos como comunidad no por confia cu nan lo bay mehora, coregi nan error, nan forma inaceptable di goberna e pais aki," Hessels ta comenta. "Tanten cu no tin e disculpa ey, nos no por confia cu lo tin mehora-cion."

Si gobierno no reconoce e fout, nos por kere cu nan ta haya cu ta masha bon. Y ta p'esey un disculpa oficial tin cu bira e prome stap pa mehora gobernacion na Aruba.

Alabes ta di sumo importancia pa pueblo realisa e daño cu mal gobernacion a causa na cada un ciudadano, pasobra no tin infraestructura ni servicio adecuado, placa di ciudadano ta ser mal administra di un manera cu no ta beneficia e ciudadano y despues no tin placa pa cuido di salud, enseñansa y seguridad di e ciudadano. Ciudadanonan mester realisa con mal gobernacion ta afectando e interesnan personal di cada un y cu ta den nos propio interes pa exige pa drecha gobernacion.

Minister Geoffrey Wever:

Agri Business Academy a resulta un exito



“Mi ta hopi contento y orguyoso pa wak cu e Agri Business Academy a culmina cu 17 persona cu a ricibi nan certificado. Ora mi a bira Minister mi a wordo acerca dor di Qredits pa Gobierno será un partnership cu Qredits pa nos boost e sector di agricultura for di perspectiva empresarial y hunto cu Minister Arends nos a cerca un Memorandum of Understanding pa organisa e Agri Business Academy y ofrece esaki na total 60 persona.

E ta un curso di 12 siman di educación di agricultura pero di perspectiva di un negoshi. Mi ta sumamente contento cu e idea aki a bira un realidad, asina nos ta demonstra di traha hunto como ministros y sector priva na beneficio di nos ciudadanonan. Esaki ta un inversión cu nos como gobierno ta haci den nos ciudadanonan. Cu e poco fondo nan cu tin nos ta purba trece cambio importante.”

Despues di a pasa den e trayecto di Agri Business

Academy, un prome grupo di (futuro) empresarionan a ricibi nan certificado den presencia di Minister Geoffrey Wever y Minister Ursell Arends. Meta di e Agri Business Academy ta pa na un manera personal y profesional, yuda cada uno cu tin e deseo di habri su mesun negoshi den agricultura of yuda esun cu kier pa su negoshi crece den e sector di Agricultura.

Negoshinan y talento empresarial ta esencial pa nos economia crece y desaroya, y



den e proceso aki, Gobierno di Aruba tin e rol di facilita pa cada ciudadano por haya e conocimiento y habilidad pa maneha un negoshi. Den e caso aki, maneha un negoshi den e sector di agricultura, un sector cu un potencial grandi pa crece. Como parti di e maneho pa stimula comercio, e Agri Business Academy ta un instrumento pa yuda e (futuro) comerciante crece y bira exitoso. Di e forma aki gobierno ta traha activamente cu sector priva pa diversifica nos economia, creando asina cuponan di trabao nobo, entrada pa gobierno y haci Aruba menos dependiente di in-

fluencia internacional segun Minister Wever.

Minister Geoffrey Wever ta desea cada participante exito cu nan ambicion pa habri y maneha nan negoshi den e sector di agricultura y ta gradici Qredits Aruba pa e bon cooperacion di semper pa hunto facilita cu nos ciudadanonan tin acceso na un programa, e Agri Business Academy. Un programa cu lo contribui grandemente na stimula comercio y talento empresarial di Aruba. Pronto lo duna e oportunidad na un grupo nobo pa participa na e Agri business Academy.

Organisador di concierto no a tene cuenta cu procedura di permiso pa evento cu artista internacional


Den e caso di e concierto di weekend aki lamentablemente e peticion di permiso pa e artistanan di Colombia conhuntamente cu nan acompañantenan a ser entrega den dos batch respectivamente 2 y 3 dia prome cu e evento.

Pa evita cualkier inconveniencia den futuro DIMAS ta haci un apelacion na tur organisador y promotor responsabel di eventonan cu artistanan of personanan cu lo bin for di exterior pa regla tur procedura di permiso cu anticipacion y no menos cu 10 dia laboral prome cu e evento.



Minister Dangui Oduber

Pa luna di Maart 2023 e resultadonan di turismo ta sigui impresionante



Minister di Turismo y Salud Publico sr. Dangui Oduber ta comparti e ultimo resultado di Aruba su turismo cu a keda publica pa ATA. E cifranan di luna di maart 2023 nos turismo ta sigui impresionante segun e mandatario. Te cu awor tur luna den año 2023 a supera esun di año 2019.

Den luna di maart 2023 Aruba a ricibi 109.295 turista stayover. Esaki tawata un recuperacion di 102% den comparacion cu maart 2019. Pa e promer cuartal di año 2023 Aruba a ricibi

306.305 turista cual ta 4.1% mas hopi cu e promer cuartal di año 2019.

E mandatario ta remarca cu año 2019 tabata e mihor año den historia pa nos turismo y ta pesey ta uza año 2019 como e año di referencia ora ta fiha riba e strategia di recuperacion.

“Aruba su resultado ta impresionante y esaki sigur ta danki na e bon sinergia y “teamwork” cu tin entre Ministerio di Turismo y tur e partnernan den turismo”.

Minister Dangui Oduber ta yama danki na Aruba Tourism Authority (ATA), Aruba Ports Authority (APA) N.V., Aruba Hotel and Tourism Association (AHATA), Aruba Time Share Association (ATSA), Aruba Airport Authority (AAA), Aruba Vacation Rentals Association. Danki tambe na tur departamento di gobierno y tur cu ta labora den e industria pa e tremendo resultado aki.

“Nos mester ta orguyoso cu e prestacion aki!” e mandatario ta termina bisando.

A sentencia enfermera falso cu kier a yuda durante pandemia cu 450 dia den prizon

(NLTimes)—Diabierna e Corte di Districto na Den Bosch a sentencia Leroy S. pa un termino di 450 dia den prizon despues cu a conden'e riba acusacion cu el a hunga como nurse na Jeroen Bosch Hospital durante e prome ola di infeccionnan di coronavirus.

Pasobra e hoben di 27 aña tabata den detencion pa un temporada caba prome cu e huicio y no a monitори'e despues cu a lag'e bay, e no mester bay back prison. S. a abusa di e deficit den personal na hospital na e comienso di e crisis, segun corte a declara den su huicio.

E cargonan contra S. ta inclui fraude y un intento pa acto di agresion, pasobra el a trata pashent sin tin un diploma. Segun e corte, no tin ningun prueba di abuso severo pasobra S. no a purba di haci pashent daño. "E corte tin un idea cu esaki tabata auto-estimacion na otro nivel." S. a subraya varios biaha durante e trato di su caso luna

pasa cu e nunca kier a haci ningun hende daño. "Mi nunca tabatin e intencion pa comete acto di agresion contra hende."

Ora e hospitalnan tabata bezig na cuminsamento di e crisis di pandemia, nan tabatin mester di hopi ayudo, pues cualkier ayudo tabata bon bini. S. tabatin 24 aña ora el a aplica pa traha den e hospital na maart 2020. El a gaña cu el a completa un educacion profesional como nurse, y por a cuminsa di biaha. Inmediatamente el a wordo dispidi despues cu a ripara cu e no tabatin suficiente training relevante. Tambe e no tabata registra como un proveedor di cuido medico licencia.

"E corte ta pensa cu ta teribel cu e sospechoso a abusa di e crisis den cuido medico na comienso di e pandemia, cu nos pais den inkietud."

E hospital a lanta caso contra e sospechoso. Un luna despues di su retiro, a deteni S. dia 18 di mei 2020. Despues el a keda deteni pa varios



luna, te ora cu e corte a lag'e bay dia 16 di februari 2021. E mester a keda bisti un aparato di monitor na su enkel, segun e corte a determina.

Fiscalnan a demanda un conviccion y un sentencia di dos aña den prizon cu un

obligacion pa wordo institucionalisa den un facilidad di psiquiatria, hunto cu otro condicionnan. Aunke exper-tonan a bisa cu S. ta menos responsabel pa su accion pa via di su salud mental, corte a bisa cu pa institucionalis'e no

ta un castigo adecua.

Pero e mester haya tratamiento obligatorio pa su problem-anan psicologico den e temporada binidero y a prohibi'e di participa den cualkier profesion medico.

Muestra di griep aviar for di un homber Chileno a musta señal di adaptacion pa mamifero

(NewYorkTimes)—Un muestra di influenza aviar saca for di un homber na Chile cu a bira malo luna pasa ta contene dos mutacion genetico cu ta señala adaptacion pa mamifero, segun oficialnan di CDC diabierna. Den estudio-nan experimental di ani-

mal, e mutacion—ambos conoci como e gene PB2— a musta cu esaki por yuda e virus reproduci miho den celnan mamifero.

E riesgo pa publico ainda ta abou, segun oficialnan di salud, y ningun caso humano tin un conexion cu e infecci-

on di e homber na Chile, ken ainda ta hospitalisa.

Ademas, e muestra tabata falta otro cambionan di genetico importante cu científiconan ta kere ta necesario pa e virus por plama efectivamente entre humano, incluyendo mutacion cu por estabilisa e

virus y yuda esaki pega miho na celnan humano.

"Tin tres categoria di cambio grandi cu nos ta kere e virus H5N1 mester experiencia pa cambia for di un virus aviar pa un virus humano," segun Richard J. Webby, ken ta un experto di griep aviar na St. Jude Children's Research Hospital. "E secuencianan for di e pashent na Chile tin un di e clasen di cambio aki, pero nos sa tambe cu di e tres set di cambio ey, esun aki ta facil pa e virus traha."

A descubri e mutacion PB2 den otro mamifero infecta cu e version aki di e virus, como tambe den algun persona infecta cu otro version di H5N1. Tin chens cu e mutacionnan a aparece den e pashent Chileno durante e curso di su infeccion, exper-tonan ta bisa. Pero probablemente e mutacionnan nan so no ta suficiente pa produci un virus cu ta plama facil entre humano.

E muestra a wordo colecta pa e Centro Nacional di Influenza na Chile y entrega pa

GISAID e dia siguiente, segun oficialnan di CDC a bisa. GISAID ta un database internacional di genomena viral.

E Ministerio di Salud Chileno a reporta e caso na e Organizacion di Salud Global (WHO) dia 29 di maart. E pashent (53) a desaroya sintoma respiratorio, incluyendo tosamento y dolor di garganta, y a wordo hospitalisa ora su condicion e deteriora, segun WHO.

Investigacion den e caso ta andante, y no a specifica e manera cual e pashent a wordo infecta, pero a detecta e virus den parha y cacho di lama den e region unda e homber ta biba.

E version di e virus aki a plama rapidamente entre parhanan salvahe den e continente di America, cual a causa un plamamento den parha domestico tambe. E virus a afecta asina hopi parha cu esaki a wordo transferi pa mamifero y "ta anticipa mas infeccionnan den humano," segun CDC.



Hulanda lo inverti 100 miyon euro pa yuda agricultor y companianan agricultural na Ucrania

(NLTimes) - Hulanda lo provee 100 miyon euro via World Bank den garantia pa yuda agricultornan y companianan agricultural y generator pa yuda e pais surpasa e winter binidero. Minister di Cooperacion di Desaroyo Liesje Schreinemacher a anuncia e promesa aki na e reunion cu a tuma luga na Washington.

Segun e minister, esaki ta e prome implementacion con-

creto di e 2.5 biyon euro cu Hulanda a priminti Ucrania pa e aña aki den e forma di ayudo pa reconstruccion. E enfoko di e suma largo aki tabata riba asistencia militar, sinembargo Schreinemacher a sigura cu otro opcionnan di sosten tambe ta den examina-

cion. “40 miyon euro lo keda usa especificamente pa negoshinan agricultural pa asina nan por cumpra grano of reemplaza ekiponan di agricultura

kibra e temporada aki,” Schreinemacher a splica. “E negoshinan aki lo simplemente ricibi un prestamo for di un banco local sinembargo pa motibo cu banconan actualmente tin duda cu lo ricibi nan placa back, awo lo tin un garantia cu nan lo ricibi nan placa back na cualkier momento. Di e modo aki e banco ta mas probabel di otorga e prestamo cu mas velocidad.”

Segun Schreinemacher, esaki no solamente lo yuda e sec-

tor di agricultura, sino esaki tambe lo ta bon pa seguridad di cuminda global mirando cu Ucrania ta exporta hopi grano.

E 100 miyon euro restante ta marca no solamente pa e compra di generator, sino tambe pa proposito manera reparacion di cayanan. E generator no ta premira di ta necesario te cu e siguiente winter, pa motibo aki lo otorga esaki den e proximo temporada despues di zomer.

Te ainda e minister no sa na ki proyectonan di recuperacion Hulanda lo aloca mas placa. Sinemargo e sosten pa kita landmine ta halto riba e lista, “pa motibo cu hendenan na e pais kier por yega cas safe,” Schreinemacher a declara.

E Minister a enfatisa cu Hulanda kier brinda sosten na Ucrania mientras ta necesario. Esaki tambe ta nifica cu e Gabinete lo considera si mas placa cu e 2.5 biyon euro ta necesario.

Corsou:

Recursonan pa mehora detencion di inmigrante

(CuraçaoChronicle) - Den aña 2019, Hulanda a haci recursonan disponibles pa combati y soluciona e problema di migracion na Aruba y Corsou. Esaki a keda crea pa e fluho di migrantenan di Venezuela como resultado di e situacion economico cu ta den aumento na e pais.

Corsou a haci peticion na Hulanda pa ricibi sosten den mehoracion y expansion di e recepcion di e migrantenan y e centro di detencion na Corsou.

Den añanan recien, recursonan a keda otorga na Corsou



pa esaki basa riba e reportanenan di progreso. E recursonan restante a keda wanta, mirando cu tabatin pasonan pendiente cu te ainda Corsou

mester a tuma pa mehora e detencion di migrantenan. Detencion na migracion y e cadena di migracion ta ambos asuntonan autonomo pa

e pais.

Corsou a tuma varios paso pa mehora e detencion di migracion y standard di derechonan humano. Secretario

di Estado Van Huffelen, ken ta encarga cu relacionnan di Reino, te ainda ta mira luga pa mehoa pero tambe ta duna gran importancia na e hecho cu Corsou por sigui cu e mehoracion y cu salvaguardia e condicionnan humano den detencion di inmigracion.

Den e discusion cu Corsou tocante detencion di inmigracion, e Secretario di Estado -despues di e mocion di parlamentario Hulandes Simons- ta sigui hala atencion na e problemanan den e detencion aki y e cooperacion general entre Corsou y NGO's.

Van Huffelen ta bishita islanan e siman aki

(TheDailyHerald) – Secretario di Estado pa Relacionnan di Reino y Digitalisacion, Alexandra van Huffelen ta bay ta na St. Maarten, St. Eustatius y Saba e siman aki di diamars te diabierna.

E Secretario di Estado a cuminsa su bishita na Bonaire riba diadomingo, y subsecuentemente ta bishita Saba diamars y diaranson. Diahuebs e ta bay ta na St. Eustatius y diabierna na St. Maarten, prome cu bolbe Hulanda e mesun anochi.

Na St. Maarten, Van Huffelen ta bay reuni cu prome minister Silveria Jacobs. E ta bay atende un reunion cu Gobernador di Sint Maarten Ajamu Baly, Lucille George-Wout di Corsou y Alfonso Boekhoudt di Aruba. Tambe riba e programa ta un reunion cu hefe

fiscal, Hieke Vriezen-Buist.

Na Saba, Van Huffelen ta bay reuni cu e Consejo di Isla recien instala y e Consejo Ehecutivo nobo.

Tambe ta programa un reunion cu Saba Business Association y un reunion di mesa rondo cu stakeholder, incluyendo Scol di Medicina di Universidad di Saba, Saba Cares y sector priva. E tema di esaki ta e oportunidadnan di digitalisacion, awo y den futuro.

Na St. Eustatius tambe e Secretario di Estado ta bay reuni cu e Consejo di Isla recien instala y e Consejo Ehecutivo nobo. Na St. Eustatius, un reunion di mesa rondo similar ta bay tuma luga cu stakeholdernan pa discuti e reto y beneficio di digitalisacion y con e ta afecta bida diario. Ademá Van Huffelen ta bay papia cu e team di

Roaming Animals Project y cu doñonan di cabrito.

E Secretario di Estado a cuminsa su bishita na Bonaire, unda el a reuni cu e Consejo di Isla y Consejo Ehecutivo nobo. Bishitanan tabata planea pa e Centro Regional di Informacion y Experticio (RIEC) di Caribe Hulandes, e fundacion cu ta maneha e banco di cuminda, Fundashon Cas Boneriano, agricultornan y negoshinan den sector agricultural.

Van Huffelen tambe a bishita e call center di entidad publico Bonaire, recien habri, pa mehora servicio di gobierno pa residentenan. Riba diamars mainta, oficialmente e ta bay duna apertura na e tayer di tres dia cu participantenan for di henter Reino tocante fondonan Europeo y con pa haci miho uso di e fondonan aki.



Despues di atake na Sudan: Embahada di Hulanda ta tuma contacto cu 50 ciudadano Hulandes

(NLTimes)—E embahada Hulandes na Sudan a tuma contact cu 50 ciudadano Hulandes desde cu e pais a experencia un plamamento di violencia entre paramilitarnan y militar regular. Esaki a wordo reporta pa Embahador Irma van Dueren diasabra anochi via un programa di radio yama Met het Oog op Morgen.

E embahada ta den contacto mas tanto cu ciudadanonan Hulandes-Sudanes cu tin ambos paspoort. “Nan ta drenta e pais y sali atrobe, van Dueren a bisa. “Na momento



aki ta Ramadan y casi Eid, pues algun hende a sali atrobe pa celebra Eid aki na Hulanda,” el a menciona riba e programa. Esaki ta haci’e dificil

pa por obtene un calculacion specifico di Hulandesnan den Sudan. E embahador Hulandes a pidi pa ciudadanonan Hulandes tuma contact cu

e embahada “pa asina tin un bon bista di cuanto Hulandes tin na Sudan y con pa yudanan.”

Actualmente, van Dueren ta na Hulanda. E tabata na Schiphol diasabra mainta pa bula bay back Khartoum, pero no tabata por pasobra e aeropuerto a cera pa via di bringamento severo.

“Mainta trempa nos a tende zonido cu tabata señala inkitud. Mi a purba di bula toch, pero na dado momento mi a tende cu e aeropuerto a cera. Desafortunadamente, mi no por a biaha.” E embahador

tin contacto cu su ekipo di embahada y e Hulandesnan na Sudan. “Tin biaha ta dificil pa tende nan, asina halto e volumen di tiramento ta,” segun van Dueren. “Nos a puntra tur hende keda cas. Te awo, tur hende ta safe, aunke nan tin miedo. Tambe tin empleadonan di e embahada cu yiu.”

Al menos 25 hende a muri diasabra pa via di e violencia andante entre gruponan militar y paramilitar. E Ministerio di Asunto den Exterior a poni aviso streng pa Sudan; esaki ta den cora awo.

Mas cu 200 hende na Rotterdam a protesta contra un atardi di lesamento pa mucha cu ‘drag queens’

(NLTimes)—Un atardi di lesamento pa mucha cu drag queens (hende homber cu ‘alter ego’ di hende muhe) na LantarenVenster theater na Rotterdam a wordo posponi den secreto pa un par ora diadomingo. Organizacion a bisa cu nan a dicidi pa haci esaki pa asina preveni exposicion di mayornan y mucha pa protestadonan cu ta contra e evento aki.

E atardi di lesamento mes-ter a tuma luga 2or di atardi, pero a move esaki pa 10:30 di mainta. Pa ora cu varios shen activista, incluyendo oponentenan a reuni pafo di e teatro, e evento a pasa caba.

E dos drag queens cu a lesa a sali for di e teatro cu man wanta, pa cual despues nan a haya webo tira den nan direccion. Activistanan cu ta simpatisa cu e evento a brinda un bon bini na e dos drag queens



cu aplauso.

Pa preveni confrontacion, e polis a posiciona nan mes entre e apoyadonan y oponentenan pa e evento di lesamento. Fuera di algun strobacion chikito, a keda keto na e teatro. Por ehempel, polis a para un grupo di proponen-tenan di e evento cu kier a cana bay cerca e oponentenan di e organizacion derechista

Voorpost. Un vocero pa polis a bisa cu nan no a detene ningun hende. “Nos a puntra hende pa bay, parcialmente pasobra nan no kier a sigui instruccion di polis.”

E teatro a ricibi hopi yama tocante e atardi di lesamento, segun nan a reporta. Entre otro, e Pink Lion Foundation y e partido di Jongerenorganisatie Forum voor Democra-

tie (JFVD) a anuncia cu nan ta bay ta presente.

E Pink Lion Foundation a bisa cu nan no ta contra drag queens, pero nan tin miedo cu e evento aki lo sigui renforza e disgusto pa drag queens y pues tambe pa hendenan homosexual, pasobra mucha ta involvi. Esaki por resulta cu drag queens nan por haya nan mes den peliger.

E evento tabata e enfoka di un debate siman pasa, den cual a acusa cu atardinan di lesamento cu drag queens lo sexualisa muchanan. Pero e drag queen Ma’MaQueen, ken ta co-organisa e evento aki pa basta aña caba, a nenga e acusacionnan aki.

“Mi curason ta kibra,” segun el a conta Nu.nl. Ma’MaQueen tabata un participante den e prome temporada di RuPaul’s Drag Race Holland na 2020. “Mi ta keda cu mi cabes ariba, pero e ta afecta mi si. E pasion cu mi tin pa loke mi ta haci a bira un topico pa bringa over dje, y esey ta sinti diferente,” el a conta un dia prome cu e evento na Rotterdam.

Diadomingo, proponente- y oponentenan di e evento a keda na e teatro ta para te un par ora despues cu e evento a caba, aunke e cantidad di persona presente a cuminsa baha gradualmente.

Residentenan na Gelderland ta sinti malo despues di descubri substancia desconoci den postbus

NLTimes)—Residentenan di un cas na Bouwmeestergoed na Putten, Gelderland, a sinti malo diadomingo despues cu a descubri un substancia desconoci den nan postbus. E polis ta sospecha cu un hende a laga un substancia peligroso atras a proposito.

Un vocero di polis no por a

bisa cuanto residente a cuminsa sinti malo. Nan a wordo examina pa paramedico y no tin kehonan cu ta bay dura largo. Segun Omroep Gelderland, e substancia desconoci a wordo laga atras den postbus di hende, pero polis no por a confirma esaki ainda. Ademas tin un holo straño riba caya den bisindario, segun e locutor regional.


A cera parti di e parke den bisindario, segun Omroep Gelderland. “Tabatin un holo straño andando, e tabata basta sterki, pero e no tabata dal bo wowo ni garganta,” segun un reporterero pa e locutor.

A tuma medidanan pa determina si e substancia ta peligroso di berdad.



Brazil:

Lula ta propone concilia den e guerra di Ucrania cu China y Emirato Arabe



(El Tiempo) - Presidente di Brazil, Luiz Inacio Lula da Silva, a propone ayera diadomingo un conciliacion conhunto cu China y Emirato Arabe Uni pa bisa “stop na guerra na Ucrania.”

E mandatario Brasileño, cu ayera diadomingo a conclui un gira di tres dia na Pekin y Abu Dabi, a afirma cu el a papia cu e presidentenan di Emirato Arabe y China tocante e creacion di un grupo di paisnan, similar na G20 di

economia avansa, pa concilia den conflicto causa pa e invasion Rusiano.

Na diferencia di e potencionan occidental, ni China ni Brazil a impone sancion contra Rusia y ta purba di posiciona como mediadornan pa pone fin na e guerra, cu a cuminsa na februari di 2022. Emirato a adopta na su bes un posicion neutral den conflicto aki, aunke a acoge un number importante di empresarionan Rusiano.

E lider di isquierda di 77 aña, cu a bin back na poder na januari, tambe a enfoca den e “decision di e guerra cu a wordo tuma pa dos pais” y a acusa Merca y Europa di prolonga e conflicto.

Ademas, den aspecto dip-

lomatico, e gira di Lula na China y Emirato Arabe a permiti pa alcanza acuerdonan multimillonario di inversion y comercio cu ambos pais.

“Tur hende sa cu m’a haci e proposicion di un especie di G20 pa paz. Ora e crisis economico a wordo produci na 2008, nos a crea e G20 pa trata di salba economia,” Lula a señala.

Ademas a bisa cu “awor ta importante pa crea otro tipo di G20 pa caba cu e guerra aki y establece e paz. Esey ta mi intencion y mi ta kere nos lo haya un exito grandi,” el a declara.

Lula a bisa cu el a papia di e iniciativa aki cu e presidente Mericano Joe Biden y e canciyer Olaf Scholz, e presi-

dente Frances Emmanuel Macron y e mandatarionan di algun paisnan sur Americano. Lula a cuminsa un ehercicio di ekilibrio entre Merca y China, dos potencia confronta pa un number halto di expediente, entre nan e tension entre Pekin y isla di Taiwan.

Na Pekin, Lula a anuncia cu Brazil ta “bin back” na escena internacional, despues di cuater aña di e mandato di su antecesor ultraderechista Jair Bolsonaro (2019-2022).

Pero prome di bay China, el a mustra confiansa tocante e fortalecimiento di e relacionnan entre Brasilia y Pekin, su socio principal comercial, no ta bay causa algun efecto cu Merca.

Mexico:

A haya 209 migrante den un trailer bandona

(El Tiempo) - Instituto Nacional di Migracion (INM) a confirma diahuebs di siman pasa e hallazgo di 209 migrante di Centro y Sur America den un trailer bandona na un carretera cerca di e localidad di Nuevo Teapa, na estado di Veracruz.

Entre e migrantenan cu a haya diaranson ultimo tin 161 adulto di Guatemala, Honduras, El Salvador y tambe di Ecuador, segun e comunicado di INM.

Di nan, 23 tabata biaha cu nan famia y tin 25 mucha menor di edad di Guatemala

cu tabata biaha nan so. Nan a keda bao tutela di Sistema pa Desaroyo Integral di Famia di Estado.

Un di e personanan tabata presenta sintoma di asfisia y a wordo hiba te un hospital. Poco prome cu 12 di anochi, segun e documento ta relata, agentenan di e institucion y Guardia Nacional a haya e auto, paden por a scucha gritonan di ayudo di e migrantenan, cu tabata aglomera den trailer.

E region ta bibando un fluho migratorio record, cu 2.76 milyon di persona indocumenta deteni na frontera di Merca cu Mexico na aña

2022.

Ademas, segun organisacionnan civil Mexicano, aña 2022 tabata esun di mas tragico pa e migrantenan na Mexico, na unda casi 900 a muri den nan intento di crusa e frontera sin documentonan for di Mexico pa Merca.

E caso di mas reciente ta e morto di 40 migrante cu tabata priva di nan libertad na un stacion migratorio na e ciudad fronteriso di Ciudad Juarez, unda un candela a cuminsa y e migrantenan no a wordo libera pa agentenan cu tabata encarga di e luga.



Panama

Defensor di Pueblo ta pidi mas presencia militar di Colombia na selva di Darien

(NTN24) - Merca, Colombia y Panama a propone stop e ola migratorio irregular creciente na e selva peligroso di Darien, un luga na frontera entre Colombia y Panama den cual casi 90.000 persona a crusa den tres luna den nan caminda pa Merca.

Pa e motibo aki, Alejandro Mayorkas, secretario di Seguridad Nacional di Merca a reuni cu e titularnan di Relacionnan Exterior y di Seguridad di Panama y Colombia pa promove un campaña e cual tin como obhetivo pa “caba cu e movimiento ilicito di personanan y mercancia” a

traves di e denomina “Tapon di Darien.”

Pa esaki, Eduardo Leblanc, defensor di pueblo di Panama, a bisa cu esaki “ta un esfuerzo titanico, tanto Colombia como Panama ta spera cu den reunion ey cu Merca por alcanza varios acuerdo. E gobiernonan tin cu satisfice e necesidadnan pa personanan no migra di manera forsa.”

“P’esey nos mester pa Colombia comparti informacion cu Republica di Panama y nos mester di mas presencia militar di Colombia na selva di Darien”, e funcionario Panameño a agrega.



Republica Dominicana:

Abinader ta ordena impedimento di entrada na 39 Haitiano

(DiarioLibre) - E presidente Luis Abinader a instrui na e director di Migracion, Venancio Alcantara Valdez, pa e no admiti den teritorio Dominicano un grupo di 39 Haitiano, entre cual tin algun cu ta sanciona pa Merca y Canada.

E presidente a hustifica su accion segun loke ta aparece den e articulo 128 di e Constitucion, texto cu ta faculta na prohibi e entrada na stranheronan den teritorio nacional ora cu ta resulta conveniente den interes publico. Ta recorda cu a Ley 285-04, General di Migracion y su Reglamento di Aplicacion ta permiti pa impedi e ingreso na teritorio nacional di e stranheronan cu tin antecedente penal of cu, den opinion di e autoridadnan competente,

ta constitui algun tipo di menasa contra e seguridad nacional y e interes di e Republica.

Ademas, den cumplimiento di e resolucion adopta pa e Consejo di Seguridad di ONU cu ta impone un con-hunto di sancionnan aplica na ciudadanonan Haitiano relaciona cu e situacion di violencia y inseguridad na Haiti.

E personanan cu tin entrada prohibi, segun e informacion di inteligencia, tabatin conflicto cu e sistema di husticia di nan pais, den algun caso, y cu otro ordenansanan, debi na temanan manera trafico di persona, apoyo na bandanan arma cu ta golpia e pais di Haiti, entre otro elementonan cu ta hustifica e limitacion di nan acceso na e teritorio



Dominicano.

Varios di e personanan señala den e lista di esnan cu no mag

di ingresa riba teritorio Dominicano a wordo sanciona pa Merca y Canada. E decision aki ta wordo tuma

poco dia despues di e bishita na e pais di e sub-secretaria di Merca, Wendy Sherman.

Venezuela:

Hobennan opositor ta wak eleccion primario como e oportunidad pa legitimisa liderazgo

(ElNacional) - E eleccion primario opositor, cu ta wordo celebra dia 22 di october, ta un oportunidad di legitimisa e liderazgo y restructura e unidad pa enfrenta e regimen di Nicolas Maduro durante e eleccion presidencial di 2024. Asina e hobennan di e partidonan politico opositor, ken ta asumi e importancia di e rol cu e hubentud ta hunga den e escenario politico nobo.

Evelyn Pinto, Jesus Mendoza, Luis Palacios, Carlos Fernandes y Victor Zambrano, secretarionan hubenil di Accion Democratica, Fuerza Vecinal, Primero Justicia, Vente Venezuela y Encuentro Ciudadano, respectivamente, ta aspira pa esaki ta u proceso inclusivo, di altura y transparencia, den marca cu e respet pa e adversario y den cual por consolida e unidad.

“E hubentud no ta kere den e liderazgo imponi; nan ta kere den e liderazgo cu ta legitimo pa e basenan di e pais aki y e miho oportunidad pa haci esey ta e eleccion primario. Nos mester confirma e liderazgo di oposicion pa enfrenta cu hopi mas forza e regimen di Maduro den 2024,” Carlos Fernandes a expresa.



Den su opinion, e participacion activo di e hobennan den e eleccion primario ta bay sirbi pa duna mas legitimidad na e proceso. “Nos mester kere den e proceso aki y traha pe, pa e pais wak cu e hubentud tambe ta hinca completo den e eleccion primario,” el a señala.

Victor Zambrano a considera cu mester probecha e proceso manera un forma di union, trabou y di loke oposicion ta capaz di haci y transforma cu bista riba 2024. “E proceso aki ta un etapa pa sigui traha pa loke semper nos a lucha

p’e,” el a manifesta.

Evelyn Pinto y Jesus Mendoza ta coincide den resalta e necesidad pa e eleccion primario ta un espacio inclusivo, den cual tur opositor cu kier wak un cambio por participa. Ademas, nan ta destaca e importancia di mantene e respet entre e candidatonan.

“Nos ta spera cu e ta un proceso transparente, cu ta den marca cu e respet, y cu nos por tin exito politico, cual ta loke nos tin mester realmente. Esaki ta un di e pro-

cesonan mas importante riba nivel politico cu nos ta bay biba pa e eleccion presidencial di 2024,” Mendoza a menciona.

E hobennan opositor a reconoce e indiferencia cu ta existi di parti di e hubentud di e pais pa loke ta trata, no solamente e proceso di eleccion primario, sino tambe pa e procesonan electoral en general.

“E berdad ta cu no ta cu e hobennan ta rechasando e eleccion primario, e cos ta

cu e hobennan despues di e ultimo seis añanan ta rechasa e politica como un espacio pa expresa nan boluntad y nan gana di sigui traha pa e publico,” Luis Palacios a argumenta.

Den su opinion esaki ta consecuencia di un regimen cu a construi un sistema cu ta fastidia e hubentud y ta expresa negatividad den oportunidadnan den e politica. Esaki, el a continua, ta haci cu e hobennan ta opta pa e sobrevivencia general cu ta biba na e pais.

Acrobata ta cay riba escenario na Coachella

(TMZ) - E audiencia na e di dos dia di Coachella a presencia un accidente horroroso unda un acrobata a cay for di e stage ariba y a dal riba vloer.


E acrobata tabatin mas o menos 5 minuut ta duna e show ora cu aparentemente su pia a slip, causando cu el a cay dal abou meymey di dos speaker. Te ainda no ta cla si el a sufri algun herida den e laira of simplemente a perde forza durante e show.

E muhe a keda riba vloer sin move mientras miembronan di e ekipo di paramedico a core subi escenario. E no a

tabatin movecion algun. E ekipo di paramedico a yega rapidamente y a pone su persona riba un cama pa asina por bay cune emergencia. Aparentemente e tabata blink mientras nan tabata bayendo cune, cual ta duna un bon señal.

E publico a keda sumamente asombra, cu algun di e personanan den e publico pidien-do e Dj pa para e musica. Un hoben tabata asina traumatiza pa loke el a mira cu el a cay flauw.

Te ainda no tin mas informacion tocante e estado actual di e acrobata.



Guillermo Rodriguez ta disculpa pa laga su cachonan na un shelter

(TMZ) - Guillermo Rodriguez conoci pa su trabao den Jimmy Kimmel su programa, a experiencia problema cu un agencia di rescate pa cacho cu a bisa cu el a adopta 2 cacho cu a termina den un shelter y Rodriguez ta aclaria cu un falta di comunicacion dentro di su famia a causa esaki.

Mutt Scouts, un grupo di rescato pa cacho basa na So-Cal a conta TMZ cu Guillermo a adopta dos chihuahua, Chase y Rey, den aña 2021 ora cu nan tabata chikito. E tabata sumamente contento cu esaki y a hasta publica potret di nan riba Instagram

regularmente. inembargo Mutt scouts ta bisa cu recientemente nan a ricibi un yamada di un shelter den e area di Los Angeles bisando cu e cachonan a ser hiba na nan pa un muhe no identifica. E shelter a yama Mutt Scouts pa motibo cu ambos cacho tabatin microchip registr na e organisacion prome cu Rodriguez a adopta nan. Esaki a causa problema pa motibo cu segun e contract di Mutt Scouts ora di adopcion, si e doño no kier e cachonan mas nan mester hiba esaki back na Mutt Scouts pa sigura e bienestar di e cachonan.

Guillermo a aclaria cu e situa-



cion a cuminsa ora cu su wela a pidi su persona cuida di su cacho grandi pa motibo cu e ta lidiando cu demencia. Na mesun tempo Guillermo a

ricibi operacion di su rudia y su stiefruman mester a cuida di Chase, Rey y e wela su cacho grandi. E ta splica cu su ruman a

drenta den panico pensando cu e cacho grandi lo herida e dos chihuahanan y a dicidi di hiba e chihuahanan e shelter. Ora cu Guillermo a haya sa, inmediatamente el a splica e ruman cu el a comete un eror y a tuma contacto cu e agencia pa pidi disculpa.

Mutt Scouts a comenta cu nan ta spera cu esaki lo sirbi como un les pa educa cualkier persona cu adopta un mascota. Chase y Rey awo ta cu Mutt Scouts ken ta buscando un hogar nobo pa nan. Tambe e agencia a conta cu Guillermo a duna un donacion di 5,000 dollar pa yuda cuida di e cachonan mientras ta haya un famia nobo pa nan.

Jeremy Renner ta papia tocante accident na Jimmy Kimmel

(TMZ) - Jeremy Renner a bisa cu e ta suerte puro cu el a logra sali bibo di su accident despues cu el a kibra 35 weso den su curpa.

E actor a drenta su presentacion na Jimmy Kimmel di-aluna pa trata e incidente.

E ta aparenta di ta den un punto di bista positivo apesar di e heridanan cu el a sufri y di cual 4 luna despues ainda e ta recuperando.

Manera a reporta anteriormente, Renner a casi fayece aña nobo ora cu el a purba di evita cu un tractor pa kita sneeuw dal su sobrino y a keda bao di e tractor. Renner a describi na Kimmel su bon fortuna despues di a ricibi e golpinan.



El a bisa "e ta manera un roller di metal pa buscuchi. El a pasa net banda di e vertebra, e no a dal ningun organo, no tabatin hinchameno interno, mi wowo si a sali cual tabata straño. Pero mi tin hopi suerte cu ningun di mi or-

gano a haya daño."Renner a bisa cu e prome pensamiento tabata su sobrino Alex ora cu e tractor a cuminsa move. Despues cu el a ricibi e heridanan, Renner ta conta cu e tabata preocupa tocante con su sobrino tabata lidiando cu



e trauma di mira su tio pasa door di e accident aki. "Mi no mira nada di esaki, pero e

sanger, mi wowo, mi mester a mira cua tabata Alex su perspectiva."

A felicita sra. Francisca Maduro-Paesch cu a cumpli e bunita edad di 100 aña

Dia 2 di april ultimo, Sra. Francisca Maduro Paesch, cariñosamente yama Mamato, a celebra su 100 aña di edad hunto cu famia-, bisiña- y amistadnan na Rooiweg, San Nicolas.

E celebracion aki a inicia cu un bunita eucaristia na cas den presencia di e invitadonan, gradiciendo Dios pa e gran bendicion di cumpli e edad respecta di 100 aña. Un momento di alegria sigur pa tur esnan cu tabata presente y por a comparti e momento special aki cu Mamato.

Sra. Francisca Paesch a nace dia 2 di april 1923 na Aruba. Nan tabata un total di ocho (8) ruman, (3) ruman



homer y (5) ruman muhe, di cual awendia Mamato so ta na bida. Mamato a casa dia 15 di februari 1945 cu Emeliano Maduro (den feliz memoria), di cual seis (6) yiu a nace, dos

(2) yiu homer y cuater (4) yiu muhe, di cual tur dos (2) yiu homer a fayece. Banda di esaki, Mamato tin dies (10) nieto, cuater (4) nieta, un total di diesshete (17) bisani-



eto (a) y un tataranieta cu ta bibando na Hulanda desde aña pasa. Mamato ta masha keri door di su famia, bisiña y conocinan. Minister Endy Croes ta gradi-

ci e gran famia di Mamato pa e invitacion pa celebra e dia special aki hunto cu Mamato. Masha pabien y bendicion!

En conexion cu nan biaha di orientacion na Hulanda:

Studiantenan di Colegio Nigel Matthew a bishita Haagse Hogeschool

Alumno y maestronan di Colegio Nigel Matthew di San Nicolas a haci un biahe di orientacion pa Hulanda y a bishita Haagse Hogeschool na unda cu nan a haya hopi informacion tocante estudio na Hulanda. Diamars mainta, Prome Minister Evelyn Wever-Croes hunto cu Minister Plenipotenciario na Hulanda señor

Ady Thijsen y delegacion di Arubahuis a bishita Haagshe Hogeschool pa duna informacion na e studiantenan di Aruba cu pa otro aña lo bay studia na Hulanda.

Representantenan di Arubahuis a duna informacion na 100 estudiante y 14 maestro tocante nan posibilidadnan pa studia na Hulanda. Arubahuis ta e cas di Aruba na

Hulanda. E centro cu ta representa Aruba na Hulanda y ta brinda ayudo na esnan cu tin mester y tur estudiante por conta riba Arubahuis pa si algo bay malo.

Prome Minister a haci un discruso cortico gradiciendo Haagse Hogeschool y Aruba cu a haci e encuentro aki cu estudiante y maestronan di

Colegio Nigel Matthew posibel y alabes a encurasha tur estudiante pa keda enfoca riba nan meta. “Keda enfoca riba bo estudio y no tambalia cu cosnan menos bon cu por crusa bo caminda. Keda enfoca riba bo meta. Si bo enfoca riba bo meta, loke sea pasa na caminda, e lo no kita bo for di bo meta. Y na boso edad

y pa boso estudio, esaki ta importante pa boso escogencia di loke boso kier studia y logra. Boso tin un posibilidad hopi grandi pa ta profesionalnan boso dilanti y Aruba tin mester di boso despues cu boso termina boso estudio pa yuda hiba Aruba padilanti”, Prome Minister Evelyn Wever-Croes a expresa.








WE ARE HIRING

TOP 25 RESORTS IN THE WORLD ON TRIPADVISOR
THE FIRST CARBON NEUTRAL RESORT IN THE CARIBBEAN

POSITIONS:

- DIRECTOR OF ENGINEERING
- ENGINEERING SUPERVISOR
- TECHNICIAN
- FRONT OFFICE SUPERVISOR
- CONCIERGE/FRONT DESK AGENT
- HOUSEKEEPING SUPERVISOR
- HOUSEMAN
- SOUS CHEF
- F&B SUPERVISOR
- COOK/COOK HELPER

BENEFITS:

- ATTRACTIVE SALARIES
- BONUS OPPORTUNITIES
- 5-DAY WORKWEEK
- UP TO 27 VACATION DAYS (BASED ON YEARS OF SERVICE)
- INSURANCES (LIFE INSURANCE, VISION & DENTAL, HEALTH DISABILITIES)
- SAVINGS & LOANS PROGRAM
- EMPLOYEE DISCOUNTS

APPLY ONLINE AT WWW.BUCUTI.COM/CAREERS

Chauffeur bao influencia bayendo trabao a bay dal riba rotonde banda di Superfood

Diasabra madrugá bibrando mainta a drenta informe di un accidente na e rotonde banda di Superfood na Bubali.

Na yegada di e patrúya a bin compronde cu e chauffeur biniendo for di Bubali bayendo (supuestamente) trabao lo a bay dal basta duro riba e muraya di e rotonde. Debi na e impacto, e chauffeur a dal su cabes y resulta herida, pero no tabata desea ambulance.



Polis a nota cu e chauffeur tabata influencia y ora a pidie pa supla e no por a haci esaki

y polis a detene. Vehículo di transporte a bin busk'e pa hib'e warda di polis.



Fayo di un Nissan despues di birada a pone auto perde control bay dal riba un muraya di cas

Diasabra atardi a drenta informe di un accidente na Purun, mesora a dirigi un patrúya na e sitio.

Na yegada di e patrúya a bin compronde cu aki ta trata di un accidente unda despues di a tuma un birada e auto Nissan Dualis a faya perde control pasa door di cura y bay dal riba un cas. Afortunadamente ningun hende a resulta herida.

Polis y seguro a tuma dato di e accidente.



Ladronnan a tapa un camara di seguridad cu un mop *Pero otro camaranan den cercanía a capt'e*



Diasabra mainta a drenta informe di un caso di kiebrot y ladroncia for di un auto na Top Drive Car Rental na Wayaca, mesora

a dirigi un patrúya na e sitio.

Na yegada di e patrúya a bin compronde cu ladronnan su-

puestamente astuto a pone un mop dilanti un camara di seguridad pa asina evita di ser descubri y asina cu un hanger dobla rek e haak di lock di e hood pa habri esaki y saca horta e bateria y e computer di e auto Hyundai Accent V825.

Pero tabata tin mas camara y camara di otro negoshinan cerca cu a logra capta esaki. Polis a pasa e investigacion pa e team auto diefstallen cu lo recoge e grabacionnan pa asina pone man riba e ladronnan.



Polis a detene chauffeur cu lo tabata bao influencia, coriendo cu auto sin papel y accidenta

Diasabra mainta a drenta informe di un accidente dilanti di McDonald's na Palm Beach, mesora a dirigi un patrúya na e sitio.

Na yegada di e patrúya a bin

compronde cu aki ta trata di un accidente unda un chauffeur ilegal y lo tabata burachi coriendo cu un Nissan Sentra sin ningun documento na ordo a tuma e birada na salida di e rotonde Palm Beach y

a subi e median y keda pega eynan. Polis a detene mesora pa tur e infraccionnan y a confisca e vehiculo sin documento na ordo.



Brake di Chevrolet Optra a bay y auto a bay cay den Rooi

Diabierna anochi a drenta informe di un accidente cu hende herida na Rooi Manoonchi pariba di Banco di Caribe, mesora a dirigi tanto polis como ambulance na e sitio.

Na yegada di e patruya a bin compronde for di e chauffeur di e Chevrolet Optra cu e brake a bay net na e birada y el a subi acera dal na e reling di e brug y bay cay den e rooi panort di caminda.

A consecuencia di esaki e chauffeur a herida su pols, pero no tabata desea ambulance y p'esey polis a cancela e ambulance.




Detencion ora polis a cera club nocturno na Palm Beach



Diasabra madrugá net despues di cu polisnan di tur e districtonan pabao di brug a cera un club nocturno na Palm Beach, polisnan a haya nan mes ta detene un sospechoso.

Mesora a pidi e vehiculo di transporte cu a core bin busk'e.

Polis a detene chauffeur burachi cu a pasa dal auto y sigui core bay




Diabierna anochi a drenta informe di cu un auto a pasa dal un otro auto banda di ex-KFC den Hendrikstraat y a sigui core bay, mesora a dirigi un pa-

truya na e sitio.

Na yegada di e patruya a bin compronde cu e auto aki a bay para un poco mas panort. Polis a bay atende e chauffeur cual su auto ta den Drive y e

mes na soño.

Polis a lant'e y a nota cu e chauffeur lo tabata bastante bao influencia y a deten'e pa a core auto bao influencia causa accidente y sigui core bay.



Spirito den oficina di Landsrecherche

Dos patruya a bay busca den full e lugar pero no a haya NADA

na anochi a drenta informe di cu lo tin movecion den land-

srecherche. Mesora a dirigi patruyan na e sitio.

Na yegada di e patruyan a busca den henter e lugar, pero no a encontra cu ningun hende.



Pornografía 'deepfake' por ta un problema den aumento den medio di desarojo di AI

(AP) - Imagennan usando Inteligencia Artificial por ser usa pa crea arte, bisti paña den cambenan virtual y yuda diseñá avisanan.

Sinembargo expertonan tin preocupacionnan cu e baña scur di e hermentnan facilmente accesibel por empeora algo cu mas tanto ta causa daño na hende muhe; pornografía falso crea sin consentimiento cu inteligencia artificial, e asina yama pornografía 'deepfake'.

'Deepfake' ta videonan y imagennan cu ta crea digitalmente of edita cu inteligencia artificial. Pornografía crea usando e tecnologia aki a cuminsa plama den internet varios aña atras ora cu un usuario di Reddit a comparti videonan unda e ta pone e cara di celebridadnan femenino riba e curpa di actriznan pornográfico.

Desde e tempo aki, creador nan di videonan 'deepfake' a cuminsa crea videonan similar haciendo uso di e cara di celebridadnan di rednan social, reporteronan y otronan cu tin perfil publico. Miles di video ta existi awendia riba un gran variedad di sitio web. Y algun ta ofrece e usuario an oportunidad di crea nan mesun video, esencialmente dunando cualkier usuario e oportunidad di converti kien cu nan kier den un fantasia sexual sin nan consentimiento of ta provee e oportunidad pa usuario nan usa e tecnologia pa causa daño na ex parehanan.

E problema segun expertonan ta cu awo a bira hopi mas facil crea deepfake sofisticada y visualmente convincente. Nan ta di e pensamiento cu esaki por



bira hopi mas pio cu e desarojo di hermentnan generativo di inteligencia artificial cu ta crea pa tuma biyones di imagen for di internet y crea contenido nobo usando data existente.

"E realidd ta cu e tecnologia lo sigui plama, lo sigui crece y lo sigui bira mas facil," Adam Dodge, fundador i EndTAB un grupo cu ta provee training riba abuso di tecnologia a expresa. "Y mientras esaki tuma luga, hende indudablemente lo sigui mal usa e tecnologia pa causa daño na otronan, principalmente via violencia sexual online, pornografía deepfake y imagennan sunu falso."

Noelle Martin di Australia a experiencia e realidad aki caba. E hoben di 28 aña a haya un video pornográfico 'deepfake' di su persona 10 aña atras ora cu pa curiosidd el a busca su potret riba Google. Te cu dia di awe, Martin ta bisa cu e no tin idea di ken a crea e imagennan falso ni videonan di su persona. E ta sospecha cu probablemente

nan a tuma un potret cu el a publica riba su rednan social y a usa esaki pa crea e pornografía.

"Bo no por gana," Martin a splica, contanto cu el a contacta varios sitio web pa nan kita e imagenna di su persona, y algun a kita e videonan mientras otronan no a contesta y riba varios di e sitio nan web aki el a bolbe mira e video publica despues cu nan a kita esaki caba. "Esaki ta algo cu semper ta bay keda eyfo. E ta aruina bo persona pa semper," el a agrega.


Eventualmente, Martin a mira den direccion di legislacion, bogando pa ley nacional na Australia cu lo duna companianan un boet di 370,706 dollar si nan no cumpli cu kita e videonan reporta cu e tipo di contenido aki for di reguladornan di siguridad online.

Sinembargo gobernacion riba internet ta practicamente imposibel mirando cu cada pais tin su mesun leunan pa cu contenido cu ta crea hopi bi-

trola cu un tipo di solucion global.

Mientrastanto, algun modelonan di Inteligencia Artificial ta bisa cu ya caba nan ta combatiendo acceso na imagennan ilicito.

OpenAI a bisa cu nan a kita contenido ilicito for di e data cu ta usa pa train e herment di genera imagen yama DALL-E, cual ta limita e habilidad di usuario nan den crea e tipo di imagennan aki. E compania tambe ta filtra peticionnan y ta bisa cu esaki ta blokia cualkier peticion di usuario cu ta crea imagen di celebridadnan of politiconan prominente. Midjourney, otro modelo, ta blokia e usuario di usa cierto palabranan clave y ta encurasha e usuario nan pa reporta imagennan problematico na e moderadornan.



17mil participante a core marathon door di Rotterdam

(NLTimes) – E marathon na Rotterdam a tuma lugar ayera mainta, afectando accesibilidad di e ciudad. Hopi caya tabata cera y tabatin multitudnan grandi. E municipalidad a conseha participante y observador pa yega riba transporte publico of bicicleta.

E di 42 edicion di “De Mooiste” a cuminsa pa 10am na e Erasmus Brug. E 17mil coredo mester a completa un ruta di 42 kilometer y 195 meter y a core prome door di Rotterdam-Zuid pa yega back na e centro di e ciudad a traves


di e Erasmus Brug, segun Rijnmond. Participantenan despues a core un vuelta rond di e Kralingse Plas, cabando e careda riba e Coolsingel.

Riba su pagina di Twitter, NN Marathon Rotterdam a informa cu Bashir Abdi a gana e marathon cu un tempo di 2.03.47. Na segundo lugar tabata Timothy Kiplagat (2:03:50) y na di tres lugar, Abdi Nageeye (2:05:32). E podium di NK tabata Abdi Nageeye na prome lugar (2:05.32), Roy Hoornweg na di dos lugar (2:13:19) y Stan Niesten na di tres lugar

(2:14:26).

Pa e hendenan muhe, Eunice Chumba tabata e ganador di e di 42 NN Marathon Rotterdam, cu un tempo di 2:20:31. Na segundo lugar tabata Tesfu Teklegergish Dolshi (2:21:35) y na di tres lugar tabata Rose Chelimo (2:26:21).

E podium di NK Marathon femenino tabata Anne Luijten na prome lugar (2:30:59), Bregje Smits na di dos lugar (2:36:34) y Eva van Zoonen na di tres lugar (2:42:37.)



Addonsito a MC e competencia di Taekwondo 2023

Fin di siman a tuma lugar e competencia nacional di Aruba Taekwondo den Centro deportivo Simeon Antonio.

Organisacion tabata den man di Monica Pimentel y su team. Cu e articulo aki Addonsito ta felicita Monica y henter Aruba Taekwondo Bond pa un evento exitoso.

E cinco scol di taekwondo participando tabata Noord, Brazil, Tiger, Impact y Estrella. Mas cu 60 atleta infantil, cadet, junior y senior a participa. Pabien na cada un di e atletanan di taekwondo y nos ta sigur cu Aruba lo conoce e campeonnan mundial den futuro hopi cerca.



Clausura di Weganan Interinsular 2023 ta tuma lugar dia 21 y 22 di april na Aruba

Despues di shete aña Weganan Interinsular entre scolnan di Aruba, Boneiro y Corsou ta tumando lugar back. Minister Endy Croes a indica cu hunto cu colega Minister di Enseñansa, Ciencia, Cultura y Deporte di Corsou, Sithree van Heydoorn y Diputado di Infrastructura y Deporte di Boneiro, James Kroon a traha hopi duro pa cuminsa cu Weganan Interinsular back.

Den luna di september di aña pasa a firma un acuerdo cu lo trece Weganan Interinsular back. Na luna di maart di e aña aki Weganan Interinsular 2023 a inicia na Boneiro unda cu e scolnan a participa den e disciplina di dam y schaak. Sigui na Corsou, unda e hobennan a participa den e disciplina di atletismo y trefbal. Clausura di Weganan Interinsular 2023 ta tuma lugar na Aruba dia 21 y 22 di april. Ministerio di Deporte hun-

to cu IBISA ta encarga pa e evento aki y lo prepara un show bunita pa e pueblo di Aruba y pa nos bishitantenan di Corsou y Boneiro cu lo ta presente pa e clausura di Weganan Interinsular 2023. Minister Endy Croes ta invita pueblo di Aruba pa apertura di Weganan Interinsular cu ta tuma lugar diabierna, 21 di april pa cinc'or y mey na Cruyff Court Denzel Dumfries na Jaburibari. Hunto ban apoya y sostene nos hobennan cu ta competiendo pa e titulo maximo den e disciplina di futbol y volleyball di Weganan Escolar 2023.

Minister Endy Croes ta desea e hobennan hopi exito; boso deseo cu disciplina, dedicacion, determinacion boso ta logra.



Bista Politico ta un seccion di Bon Dia Aruba specialmente pa brinda oportunidad na tanto partido politico como politico individual pa expone nan opinion. Contenido publica di ningun manera ta refleja opinion di Bon Dia Aruba y ta pa responsabilidad exclusivo di e organisacion/individuo cu ta ofrece esaki pa publicacion. Bon Dia Aruba ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki subeto na evaluacion exclusivo di Bon Dia Aruba.

BISTA POLITICO

Barcelona ta extende su racha sin victoria despues di empate cu Getafe

(AP) — Barcelona a extende su racha sin victoria cu un empate 0-0 na Getafe den liga Spaño ayera, permitiendo Real Madrid na segundo lugar pa reduci e bentaha enorme di su rival na 11 punto, cu nueve ronda faltando.

Tabata e di tres wega consecutivo sin victoria pa e club Catalan. Madrid, cu ta principalmente enfoca riba e Champions League y e Copa del Rey, a gana 2-0 na Cadiz riba diasabra.

Buscando su prome titulo den liga desde 2019, Barce-

lona tambe a keda den un empate sin anotacion na Girona na cas den e ronda anterior. Prome cu esey, a soporta un perdida decepcionante 4-0 contra Madrid na Camp Nou den e semifinal di Copa del Rey.

Barcelona a gana cinco consecutivo prome cu e derota contra Madrid den e Copa. Nan siguiente partido na ta cas contra tercer lugar, Atletico Madrid, cu despues riba diadomingo ta ricibi Almeria, menasa cu relegacion, y ta buscando pa gana su di seis partido consecutivo pa yega back dos punto leu di

Madrid.

E Liga ta e unico competencia unda Barcelona ainda por gana den resto di e temporada. A gana e Super Cup Spaño den un final contra Madrid e aña aki, pero a keda elimina di tanto e Champions League como e Europa League.

Getafe, cu no a gana den tres partido di liga consecutivo, a keda na di 15 lugar, cuatro punto riba e zona di relegacion.

E ultimo titulo di Barcelona den liga tabata tempo cu Lionel Messi ainda tabata den e team.



Despues di partido para NAC-Willem II:

Hooligans no por sigui comete e accion aki sin consecuencia, segun alcalde



(NLTimes) – Alcalde di Breda, Paul Depla a describi como “profundamente tristo” cu a tira klapchi y obhetonan for di tribuna durante e partido entre NAC y Willem II diabierna nochi. Esaki a conduci cu finalmente mester a stop e partido.

Den un entrevista cu corant regional BN DeStem, Depla a condena e mal conducta riba tribuna. “Mi ta spera cu fanaticonan realisa cu e grupo di hooligan aki ta destruyendo nan festival di futbol,” e alcalde a bisa den e articulo,

cual el a comparti riba Twitter.

E mensahe principal di e alcalde, segun su vocero, ta cu “e hooligannan mester stop di kere cu nan por comete accionnan asina sin consecuencia. Nos a muestra ayera nochi cu esaki ta con bo ta haci daño na e club y e otro fanaticonan. Nan ta dañ’e pa tur otro hende.”

Depla, kende a consulta cu KNVB, Polis y ministerio di Husticia y Seguridad den number di 31 comunidad futbolistico, a referi na trece y cende klapchi durante par-

tido como “completamente idiota y mal pensa.”

Un cantidad di fanatico a sufri kima ora a cende klapchi bao e pantaya grandi na e evento.

NAC sa cua sostenedor a tira klapchi riba e cancha durante e partido na cas cu Willem II. Segun un vocero, e club ta buscando ainda pa publico cu a tira cup cu cerbes riba hungadornan di Willem II despues den e wega. Video por yuda identifica e agresornan. Polis di Breda ainda no a aresta ningun sospechoso, segun vocero di polis.

Pegula ta pusha Merca riba Austria den final di Billie Jean King

(AP) – Jessica Pegula a manda Merca den final di Billie Jean King Cup, unda e Mericanonan ta bay tin e chens pa extende nan record pa mayor cantidad di titulo.

No. 6 Gauff, hungando na su ciudad natal, a derota Grabher den e partido di apertura.

Awo e Mericanonan tin mira riba un di 19 titulo den evento di team femenino.

Pegula y Coco Gauff ambos a gana dos biaha den un victoria 4-0 riba Austria den Delray Beach, Florida. Pegula a gana e empate best-of-five pa e Mericanonan cu un victoria 6-1, 6-3 riba Julia Grabher di Austria riba diasabra.

E victoria a duna e Mericanonan un bentaha 3-0 y Gauff a sigui door di bay back cu su ex-partner Caty McNally pa derota Sinja Kraus y Melanie Klaffner 6-1, 6-4. Pegula tambe a gana su partido singles diabierna despues cu

Francia, Spaña, Republica Checo, Kazakhstan, Alemania, Canada y Italia tambe a sigura avance den e finalnan, programa pa dia 7-12 di november na un sitio cu ainda mester determina. E paisnan aki ta bay join campeon actual Suiza, finalista di 2022 Australia, y un recipiente di wild-card na e final, cu un spot cu ainda mester determina for di e clasificacion. Tur e paisnan aki a yega di gana e cup, cu excepcion di Kazakhstan y Canada.



Bista Politico ta un seccion di *Bon Dia Aruba* specialmente pa brinda oportunidad na tanto partido politico como politico individual pa expone nan opinion. Contenido publica di ningun manera ta refleja opinion di *Bon Dia Aruba* y ta pa responsabilidad exclusivo di e organizacion/individuo cu ta ofrece esaki pa publicacion. *Bon Dia Aruba* ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki subeto na evaluacion exclusivo di *Bon Dia Aruba*.

BISTA POLITICO

Parlamentario Shailiny Tromp-Lee (MEP) na partido AVP:

Integridad segun ta cumbini?

Delaster dlanan mas mi lesa, mas mi scucha, mas mi ta tuma nota di e double standard di cierto politiconan. Desaroyonan actual di e partido mas grandi di oposicion ta yena cu esakinan. Tin ta exigiendo pa integridad basa riba, segun nan, hechonan di miembronan prominente di partido y cu ta pone un nubia scur riba nan partido, pero ta lubida e hecho y realidad cu e nubia aki tabat'ey di prome cu el a subi lista.

Cu otro palabra, no obstante esaki, a dicidi di join e partido y profila su mes banda di e miembronan prominente aki, a core campaña cu nan y a bin ta traha cu nan te di dia di awe. Pregunta ta: dicon a warda te awor pa sali colga paña sushi di partido na cabuya? Of ta djis integridad segun ta cumbini? Of diripiente pa argumenta bo desapunto, rabia y hostinacion pa e hecho cu bo propio partido a ridiculisa bo y accentua e hecho cu bo a gaña pueblo den e caso aki, a ocasiona tur

cos? Pasobra hecho tambe ta cu no ta Mike de Meza so a manda nan “bay muri” pa loke ta trata e caso Tofanelli, pero ta bo lider Mike Eman y bo otro coleganan Arthur Dowers y Benny Sevinger tambe a laga boso ataca, cuestiona y gaña riba MEP mientras ta bo mesun partido mes ta esun cu a fiha e direccion y desaroyo encuan to e caso aki. Interesante pa pueblo haya sa e pakico di e accion aki di nan parti pa cu nan nobato di partido.

Awor cu a atacha bo credibilidad personal diripiente hechonan existente di desde bo entrada den partido ta stroba? Diripiente ta boga pa norma y balornan di good governance? Kier papia di hisa calidad di politica mientras ora ta cumbini ta aplica politica bieu pa haya atencion y crea fama. Te dia di awe mi no a tende ningun disculpa na pueblo pa a malinforma encuan to e caso Tofanelli. Di cueste loke cueste semper mester pinta MEP malo y como gañado na beneficio partidista y of personal. Ta

bon pa pueblo para keto un rato y puntra dicon ta te cu awor diripiente a realisa e necesidad cu un cambio profundo ta necesario den su partido. Dicon nunca antes a sali publicamente cuestiona postura di partido pa cu e casonan IBIS y Avestruz y a warda te cu awor. Integridad no ta algo cu nos mester kier segun ta cumbini nos, integridad mester keda aplica na tur momento y bou tur circunstancia.

Partido MEP a bin ta traha estructuralmente pa garantisa integridad den gobernacion. Mas cu claro a integra integridad den e programa di campaña di Partido MEP tambe. Ora a yega e momento, Lider di Partido MEP y actual Prome Minister di Aruba sra. Evelyn Wever-Croes, a percura pa integridad a forma e liña cora den maneho di Gabinete Wever-Croes. Den e programa di Gobernacion partnernan den coalicion a stipula cu mester brinda pueblo di Aruba un gobierno basa riba bon gobernacion, transparencia y integridad



den gobernacion. Na mes momento poniendo hopi enfasis riba un finanzas publico responsabel pero sin perde di bista cu semper e ser humano mester keda central.

Fraccion di MEP di su banda tambe a demostra cu a traha duro pa percura cu e concepto no ta keda bashi y solamente na palabranan bunita riba papel. A percura pa trata y aproba leynan necesario pa garantisa integridad den gobernacion. Leynan manera Ley di Financiamiento di Partidonan Politico, Screening Ministers y Ley di Ombudsman y tambe mester men-

ciona cu a percura pa aproba fondo pa duna inicio na Bureau Integridad y Integriteitskamer. No obstante esaki ta bon pa enfatisa e hecho cu den bida y den politica ora nos haya cierto responsabilidad pa carga y e oportunidad pa representa nos pueblo nos mester sa pa haci esaki dignamente y responsablemente. Nos mester ta consciente cu si bo no cumpli of haci cosnan iregular bo mester responsabilisa bo mes pa esakinan tambe. Algo cu semper MEP a para pe, contrario na AVP cu ta brasa corrupcion y cuestiona jan en allemaal y nunca nan mes.

Prome Minister Evelyn Wever-Croes (MEP):

Cu e areglo cu a firma cu Hulanda e miho temponan lo cuminsa

Diahuebs atardi, Prome Minister Evelyn Wever-Croes a regresa di su biahe di trabou na Hulanda, manera cu el a expresa, cansa pero hopi satisfecho di e logronan y reunionnan importante pa e recuperacion financiero di pais Aruba.

Durante e conferencia di prensa na aeropuerto na su yegada, Prome Minister a duna un resumen di su biahe di trabou cu ta inclui logronan di su biahe entre otro firmamento di e Onderlinge Regeling, e prome reunion riba nivel gubernamental pa trata e debe di Covid y mas di 30 reunion.

Prome Minister a lamenta cu na Aruba mesora a cuminsa ataca e logronan y tabata prepara pa esaki tambe y tin tur documento pa mustra con importante e logronan ta pa



nos pais. “Mi a bolbe bek yen di animo y determinacion pa sigui lucha pa hiba nos pais padilanti”.

Logronan importante desde 2017

Prome Minister a duna di

conoce cu awo, despues di e logronan y reunionnan na Hulanda, tin claridad pa loke Aruba mester haci awo. Gobierno, ya desde 2017 a bin ta trahando duro riba e tereno financiero y tabata tin logronan importante. Entre otro

a logra un surplus financiero pa Aruba despues di 12 año. Gabinete Wever-Croes a mehora e ciclo presupuestario, a entrega e presupuesto na tempo, el a wordo aproba door di Parlamento na tempo. “Esakinan ta logronan inmensamente grandi cu pais Aruba a experiencia despues di hopi año”.

Rating

Un logro cu tambe ta hopi importante ta cu nos rating agencies ta keda mantene Aruba riba un nivel positivo. Standard & Poors a mantene Aruba riba e rating positivo. Fitch a upgrade Aruba y IMF tambe a mehora e outlook cu nan ta duna na Aruba. Tambe, esfuersonan di Aruba riba e tereno di labamento di placa, Aruba a sali e di dos pais miho den Caribe riba reglanan di CFATF pa loke ta trata labamento di placa. Tambe inversionistanan internacio-

nal ta sigui hopi interesa den Aruba.

Prome Minister a enfatisa cu e Gobierno di Gabinete Wever-Croes, un biaha mas a demostra di ta un Gobierno serio, responsabel y hopi stabiel y capaz pa atende cu tur reto di nos pais. “Mi kier sigua henter comunidad di Aruba cu gobernacion di Aruba ta den bon man,” agregando: “Cu e areglo cu a firma cu Hulanda, e miho temponan lo cuminsa y nos lo mira mas e frutanan di recuperacion. E frutanan di e reformanan cu nos ta implementando, y den bon cooperacion den henter Reino, nos lo yega na solucion di tur e retonan cu nos tur ta biba cu ne. Aruba, Corsou y Sint Maarten tin retonan similar. Y nos a demostra awo cu ora cu para hunto, cosnan grandi por wordo logra”, Wever-Croes a expresa.

Minister Geoffrey Wever

Registracion ta habri pa curso Finanzas den mi Hogar na Oranjestad

Curso 3 di e proyecto Finanzas den mi Hogar ta bay start y despues di Paradera y San Nicolas, awor e distrito di Oranjestad ta na beurt. E curso ta start riba 8 di mei 2023 y tin un duracion di 4 siman. Na final di e curso cada cursista lo ricibi un certificado di participacion.

E curso ta consisti di 4 sesion cu lo enfoca riba con nos por mancha nos finanzas cada dia. E 4 sesion ta:
Sesion 1: Mi ta efectivo den mi cas. Con mi por spaar y tambe con pa cumpra sin emocion;
Sesion 2: Mi ta paga mi debe. Kico lo pasa ora mi no por paga mi debe mas;
Sesion 3: Mi ta inverti den mi futuro. Futuro di nos y nos yunan ta importante y con nos por logra nos metanan;
Sesion 4: Mi presupuesto. Kico ta luho y prioridad y con segun bo entrada bo por presupuesta y asina logra nos metanan.



Ta necesario pa remarca, e importancia di e curso aki. Na Aruba 3 di 10 hogar ta gasta mas di nan entrada tur luna segun sondeo di Banco Central di Aruba. E desaroyo aki ta uno preocupante pasobra e ta indica cu cada luna ta un reto pa hogarnan cumpli cu tur necesidad y responsabilidadnan financiero manera entre gasto pa vivienda, cuminda, y prestamonan personal. Como consumidor ta importante pa sa ki impacto cada decision financiero tin riba nos cartera y nos hogar. Cu e curso aki, nos ciudadanonan ta ricibi guia y conocimiento cu por yuda tuma decisionnan financiero cu ta beneficia

su bienestar, den tur distrito di Aruba y awor den distrito di Oranjestad. E Proyecto Finanzas den mi Hogar a wordo desaroya door di Fundacion Plan di Bida. Fundacion Plan di Bida cu su presidente Sra. Paloma Osorio- Tromp tin como mision y vision trece conscientisacion den nos comunidad, ofreciendo ayudo y guia mustrand e manera pa mancha nos finanzas mas efectivo. Hunto cu Fundacion Plan di Bida lo ofrece un curso como apoyo na nos hendenan.

Minister Geoffrey Wever ta invita cada pa registra y participa pa asina haya e apoyo necesario pa un maneho di bo finanzas. Registracion ta completamente gratis, pero cupo ta limita.

Pa mas informacion y registracion por tuma contacto cu Fundacion Plan di Bida via telefon 568-8848 of e-mail finansasdenmihogar@gmail.com.

Curso di Arte Neurografico pa 35-85+

Como parti di proyecto di innovacion HGGH ta bay ofrece un tayer di Arte Neurografico pa personanan entre 35 y 85+ aña di edad. E tayer lo ser duna door di Jo-Ann Kock-Ridderstap.

Arte Neurografico ta un combinacion di neurociencia y creatividad pa produci dibuho y diseño unico y significativo.

Dia: 22 y 29 di apri, y 6 di mei.
Orario: 9-11:30am
Lugar: MFA Paradera

Pa inscribi manda un WhatsApp cu bo nomber y fam na 641-9272 (orario di oficina). Cantidad di participante ta limita na 30 persona.



Prome reunion cu musiconan pa Aruba Caiso & Soca Monarch 2024 lo tuma lugar diadomingo awor



Pa medio di e comunicado publico aki, Stichting Musica ta recorda tur musico y lider di banda cu e prome reunion relata na Aruba Caiso & Soca Monarch 2024 lo tuma lugar riba diadomingo awor.

Fecha: diadomingo, 16 di april 2023
Orario: 1 PM
Lugar: oficina di Plaza Betico Croes

Tur musico, cantante y lider di banda ta bonbini pa participa na e reunion. Inscripcion pa participa na Aruba Caiso & Soca Monarch 2024 lo habri oficialmente riba e dia aki y Stichting Musica lo duna oportunidad na esnan presente pa trece nan pensamiento y sugerencia nan pa dilanti.

Stichting Musica ta motiva pa pone un tremendo festival riba pia, bon organisa manera semper y cu innovacion, creatividad y apoyo di e propio musiconan. Pa e motibo aki, e organizacion ta urgi tur musico y lider di banda pa ta presente diadomingo awor na Plaza Betico Croes.

Resultado Sorteo april 14 y 15, 2023				Cadena Alexander Lottery ta presenta resultado di weganan di suerte			
DIARIO				DIADOMINGO			
2369	2043	8069	0107	0238	3437	4703	7375
4170	1443	SUPER5	3048	2330	8154	SUPER5	1435
5349	5225	-	0637	-	5113	95555	8446

MERCIA		ANOCHI		DIADOMINGO MERCIA	
CATOLINI Sorteo # 3884 5933 5098 4513 FP	CATOLINI Sorteo # 7917 7510 0633 8258 FP	LOTTO 5 Sorteo # 2380 0 x Jackpot 0 x Match 4+ 37 x match 4 786 x Afl. 12,00 02-08-10-12-29 Sorteo # 6090 0 x Jackpot 7 x Match 4 277 x Afl. 8,00 Mega Ball: 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 Afl. 400.000,-	09-11-16-27-35 Joker 19 Letter J Proximo Jackpot 1.100.000,-	CATOLINI Sorteo # 3885 2591 8271 2166 X2 BIG 4 Sorteo # 3885 7407 OFF Sorteo # 1941 1702 ZODIAC Sorteo # 3885 2977 Cancer LUCKY 3 Sorteo # 759 231 X2	LOTTO 5 Sorteo # 0 x Jackpot 0 x Match 4+ 0 x match 4 0 x Afl. 12,00 11-16-21-26-30 Sorteo # 6091 0 x Jackpot 5 x Match 4 101 x Afl. 8,00 Proximo Jackpot 92.000,- Mega Ball: 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 Afl. 400.000,-

Clasificado

ECONOMICO aviso@bondia.com

Personal GRATIS max. 20 palabra
 PASA LAGA BO AVISO NA OFICINA DI BON DIA
 ARUBA WESTSTRAAT#22 FOR DI 9:00AM-4:00PM
 Email nos na
 classified@cspnv.com

TA BENDE

Un edificio commercial / y por wordu usa pa cas cu grandura di 62 m2, riba terreno eigendom na Moko.
 Prijs Afl. 235.000,=
 Pa mas informashon por jama
Tel: 582-8080

216507

TA BENDE

Hooi a yega (yerba pa bestia)
 Matividiri 60
 594 1317
 Afl.55 pa 74 LB
 Tel. 594 1317

SERVICIO PUBLICO

Construction
 remodelacion di cas, traha cas, apartment, traha y drecha dak, electricidad, verf pega mosaico, traha cura, plomeria. Bon prijs
Tel. 593 3141

SERVICIO PUBLICO

Buscando auto pa huur y na bon prijs? yama nos
Tel. 593 9953/ 593 8453

TA BENDE

BBQ Grill tipo cilinder
 "criyoyo" duradero
 Prijs Afl.250
Tel. 569 7787

SERVICIO PUBLICO

Sushi den cura pa solamente 50,- pa buelta, nos ta lante lague limpi mane un soño.
 Arubiano trahado
Call 592 5766

Sushi den cura?

Ta piki sushi cu pick-up grandi pa Afl 75,= pa buelta.
 Yama nos na
561 4297 of 561 5179
 Hasi Aruba Limpi.

SERVICIO PUBLICO

Limpieza pa cas y auto
 Presure wash cura di cas
 Laba muebles
 Laba tapijt
 Laba sienta di auto
 Laba vloer
Tel. 593 9464

TA BENDE

Caha di Orgel.
 Tin 3 cylinder NOBO.
 Pa mas informacion yama
Tel. 593 0203

SERVICIO PUBLICO

Pa tur trabou di tapiceria di mueble, auto, yate y barco.
 Nos ta haci trabou di cabana y bambu y nos ta verf
Tel : 569 7539 /737 3993

AUTO Y HERO BIEU

Nos ta piki auto, airco y bateria bieu pornada. Frigidaire, stoof, wasmachin, tv ta 10,=.
Yama 561 4597 / 561 5179
 Arubiano Balente

TA BENDE

Combo di regalo pa tur ocasion: Mugs, kerki di biña, tablashi cu leyenda
 Pa mas informacion
Cell whatsaap 567 2907

TA HUUR

Se alquila habitacion con todo incluido
 Brikstraat na Playa
Tel.564 1979

SERVICIO PUBLICO

Sra. ta haci cas y negoshi limpi tambe por cuida baby y hende grandi part time y full time
Tel. 740 7573

SERVICIO PUBLICO

Ta haci tur trabou di construccion y carpinteria y tur cos cu ta furamento di stul di bambu, cabana y toldos
Tel : 746 0518 / 569 7539

SERVICIO

Unified One Events
 Photos , films, wedding
Tel. 749 2533

SERVICIO PUBLICO

Ta traha y renoba Cas ta traha y drecha dak, ta basha vloer, pleister, verf cas, traha cura, pega mosaico y azulejo-
Tel.563 4168

SERVICIO PUBLICO

Nos ta haci trabou di plomeria, electricidad, hardineria incluye hiba sushi Handy man.
Tel.742 6250

SERVICIO PUBLICO

Mi ta chapi, lanta sushi, corta mata, transporta frigidaire, was-machine biew, drecha cas, etc.
Tel. 564 1979

SERVICIO PUBLICO

Pa haci trabow di verf y chapi, tur mantencion di pafor di cas Yama y puntra pa Benito na
Tel.630 5185

TA BUSCA

trabou pa haci cas limpi, negoshi of oficina
Tel.561 3910

SERVICIO PUBLICO

Handyman
 Pa trabouw di verfmento plumbing tuberia, chapi, limpieza di cura, drecha mata
Tel : 567 1108

TA BENDE

1 set di aparato pa pone taira patras auto chowe auto grandi
 2 biem pa pone patras di pick up pa lastra trailer.
 Bon prijs
Tel. 594 8842

TA HUUR

Un edificio / local commercial cu grandura di 62 m2, tin baño y cura; situa na Moko cu parking lot. Prijs pa luna Afl. 1.500,=
 Pa mas informashon por jama
Tel: 582-8080

216507

SERVICIO PUBLICO

Pa trabou di data-entry of update di bo administracion pls contact:
Tel.5682339

SERVICIO PUBLICO

Mi ta ofrece servicio di electricista en general corto circuito y mantencion
Tel.566 5026

TA HUUR

Un camber cu tur cos inclui na Brikstraat 1
Tel.564 1979

SERVICIO PUBLICO

Masaje relajante, sports masajes, aroma terapia, piedras calientes, reflexologia, faciales Sabana Basora # 157 P.Ch.
Tel. 561 8520

SERVICIO PUBLICO

Mi ta ofrece pa cuida di mucha di dialuna pa diabierna y weekend. Pa informacion
Tel. 558 7310

SERVICIO PUBLICO


Nos ta chapi, corta y planta mata, brinda tur servicio cu bo cura mester. Tira sushi afo, tur esaki na un super bon prijs
Tel. 738 1908

SERVICIO PUBLICO

Ta ofrece pa verf y chapi cura bon prijs. Nos ta hiba e sushi. Yama pa mas informacion na
563 4828 / 5679610

SERVICIO PUBLICO

Hacemos todo tipo de construccion, reparacion de casas, pintura, acabados finos, jardines, patios, techos a buenos precios
Tel. 569 7539 / 746 0518



Cas Di Cultura

Vondellaan 2 Aruba
 297-582-1010

F A D A

Campanastraat 5 Aruba
 297-583-2999
 297-583-9610
F A V I
 Primavera 233 Aruba
 297-582-5051
 297-582-5222

F E P O

Engelandstraat 15 Aruba
 297-583-1016
 297-583-6607

Fundacion Contra Violencia Relacional
 Tel: 583-5400

Fundacion Autismo Aruba
 Irenestraat 21 Aruba
 297-588-1179

Fundacion Pa Nos Muchanan
 Cumana 2 Aruba
 297-583-4247

Fundacion Tel Pa Hubentud
 Wilhelminastraat 19 Aruba
 297-588-6138
Koningin Wilhelmina Fonds
 Spinozastraat 9 Aruba
 297-582-0412

Mary Joan Foundation
 Sabana Blanco 8 Aruba
 297-588-9999
Rode Kruis Aruba
 Pedro Gallegostraat 14
 Tel.297-582-2219
 Fax 588-3376

Famia Planea (SBVO)
 Avenida Milio J Croes 17 B Aruba
 297-588-9591
 www.famiaplanea.org
 famiaplanea@hotmail.com

Stichting Fundacion Guia Mi
 George Madurostraat 34
 297-582-0088

Y M C A

Calbasstraat 1 Aruba
 297-582-3072

AL-ANON group
 Sabana Liber #8, Noord (close to the hotels)
 Tel: 736-2952 or 593-7081



Dokter na warda

Oranjestad San Nicolas
Hospital Imsan
 7:00 pm / 10:00 pm **24 ora**

Botica na warda

Oranjestad: San Nicolas:
 Sta. Anna Seroe Preto
 Tel. 586 8181 Tel. 584 4833

EMERGENCIA 911

POLIS

Oranjestad 100
San Nicolas 104
Santa Cruz 105
Noord 107

Tip Line

11141
Brandweer 115
Ambulance 911
Hospital 527-4000
Imsan 524-8833
Warda Costa 913
Seguridad Nacional 11911
Cruz Cora 582-2219

BOTICA

Aloe 584-4606
4 Centro Medico 584-5794
Central 585-1965
Dakota 588-7364
Del Pueblo 582-1253
Eagle 587-9011
Kibrahacha 583-4908
Maria 585-8145
Di Servicio Noord 586-4606
Oduber 582-1780
Paradera 588-6638
San Lucas 584-5119
San Nicolas 584-5712
Santa Anna 586-8181
Santa Cruz 585-8028
Sero Preto 584-4833
Trupial 583-8560

UTILIDAD

Setar 117
Web 525-4600
Elmar 523-7147

FUNERARIA

Aurora 588-6699
Royal Funeral H. 586-4444

Servicio di Taxi

Aruba Transfer Tour & Taxi C.A.
 Tel: 582 2116 /582 2010

Taxi Adres Services (24h)
 Tel. 587 5900

A1 Taxi Services Aruba
 Tel: 587-8850
 Tel: 280-2828
 Whatsapp: 592-7024

Aurora

Royal Pray

Funeral Home & Crematory

Confia den Señor, hasi bon, habita tera y keda fiel. Busca bo goso den Señor y l'e duna bo tur loke bo curason por desea. Salmo 37: 3-4

Despues di un bida alegre y contento a bay laga nos na un bunita edad di 92 aña



Justa Teresa Paublini

Cariñosamente yama: "Tica"
12-04-1931 - †12-04-2023

Ayudante manera yiu:
Omaira Piña

Primo(a)nan:
Fredy Tromp
Buchi Tromp y famia
Glenda Tromp y famia
Cathalina van der Biezen y famia
Vda. Helena Tromp y famia
Frederika Tromp y famia
Vda. Arentina Lacle-Tromp y famia
Maria Cardoze- de Haas y famia
Nanana Tromp y famia
Famia paublini na Venezuela
Edriet Leon y famia
Luis Henriquez Gonzalez y famia

Amigo(a)nan di cas:
Elsy Toppenberg y famia
Marlene Pablo y famia
Elsa de Castro de Gonsalez
Herburt Toppenberg y famia
Maikel Quant y famia
Bibi Arends y famia
Maritza Odor y famia
Leonardo (Buchi) Henriquez y famia
Jony Flemming y famia
Fanny de la Rosa
Vda. Ludwina Vis y famia
Dinacho Sussebeek y famia
Yvon Tromp y famia
Phill Odor y famia
Celsa Croes y famia
Minister Andy Croes y famia
Sandra Croes y famia
Edmond Croes y famia

Ihanan mucho hopi pa menciona

Famia, amistadnan y bisiña: Paublini, Toppenberg, Pablo, de Haas, Cardoze, Solognier, Paula, Odor, Kock, Lacle, Tromp, Dias, van der Biezen, Farro, Gonzales, Sussenbeek, Abdoel, Khan, Leon, Krozendijk, Bareño, Macho, Henriquez, Arends, Vink, Vis, Abath, Comenencia, Croes, Kelly.

Ta invita pa e acto di condolencia y entierro cu lo tuma lugar diamars 18 di April 2023 na misa Pro Catedral San Francisco de Asis di 2'or pa 4'or di atardi, despues saliendo pa Santana catolico na Playa.

Disculpa nos pero despues di entierro nos no por ricibi bishita di condolence na cas.

Aurora

Royal Pray

Funeral Home & Crematory

Pasobra e pago di picá ta morto, pero e regalo cu Dios ta duna ta bida eterno, cu nos por haña den nos Señor Cristo Hesus Romanos 6:23

A bay sosega na edad di 90 aña:



Sra. viuda Miguelina Stewart-Correa

Mihor conoci como: "Nanay, Nay, Tante"
*29-09-1932 - †11-04-2023

Na number di su:

Yiu: Sonia Stewart

Nieto(a)nan stima:
Alfred van der Linden y famia
Mariella van der Linden

Bisanieto(a)nan:
Christian
Jayvian
Kyleeh
Zia

Sobrinanan mescos cu yiu:
Anuska van Eck
Nuris Gracia

Rumannan:
†Bienvenido
†Fausto
†Nereida
†Tomas
†Thelma
Angela
Oscar
Asuncion
Francisco
†Altagracia
Magaly
Rolando
Juanita
Oswaldo

Sobrino(a)nan: Correa, Grant, Ten Bergen, Clark, Granger, Kraaij, Meeuwisse, Ter Beek, Merkies, Dijkhoff, Polanco, Nuboer, Burgos, Mohamed.

Acto di entierro lo tuma lugar na Aurora Funeral Home den seno familiar dialuna 17 di April 2023 di 9'or pa 11'or di mainta.

Aurora

Royal Pray

Funeral Home & Crematory

"Señor ta mi wardador, mi'n tin falta di nada Den cunucu di yerba berde e ta ponemi sosega. E ta hibami na awa trankil, Pa mi bolbe haña forsa". Salmo: 23

Cu inmenso dolor na nos curason, nos ta anuncia fayecimento di:



Aerialo Buckley

Cariñosamente yama: "Yeyo"
*31-05-1938 †14-04-2023

Acto di despedida lo wordo anuncia despues.


Aurora

Royal Pray

Funeral Home & Crematory

"Señor ta mi wardador, mi'n tin falta di nada Den cunucu di yerba berde e ta ponemi sosega. E ta hibami na awa trankil, Pa mi bolbe haña forsa". Salmo 23

Cu inmenso dolor na nos curason nos ta anuncia fayecimento di:



Ciriaco Paesch

Mihor conoci como: "Cheja"
*08-08-1939 - †14-04-2023

Acto di entierro lo wordo anuncia despues.

Aurora

Royal Pray

Funeral Home & Crematory

"Dios ta amor... y amor ta Dios,
maske mi no ta na e mundo aki, tur dia lo mi
ta banda di boso Curazon, mi por stens di loke
Señor ta hasi"
Salmo 33

Cu dolor na nos curason, nos ta participa
fayecimento di nos ser stima:



Sra. Tamarah Maria Kingsale-Laclé
Cariñosamente yama "Tamy"
*12-02-1975 - †12-04-2023

Acto di despedida lo wordo anuncia despues

Aurora

Royal Pray

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa". Salmo 23

Cu inmenso dolor na nos curason pero nos ta
anuncia fayecimento di:



Venancio Kock
*13-02-1937 - †12-04-2023

Acto di Entiero lo wordo anuncia despues.

Celebracion Dia di Rey 2023

Comision celebracion dianan nacional hunto cu biblioteca
nacional ta organisa un tayer di fli y exposicion

Hisamento di fli ta parti di
nos cultura y tur aña den
luna di april tin actividad y
competencia di hisamento
di fli den barionan. Riba e
peticion di Minister di Cul-
tura, Comision Celebracion
Dianan Nacional a acerca
Biblioteca Nacional pa por
organisa un tayer con pa
traha fli pa nos muchanan y
hobennan. Tur e fli cu wordo
traha lo wordo poni den sala
di exposicion na Biblioteca
Nacional situa na George
Madurostraat.

E tayer lo tuma luga diaranson
19 di april na Biblioteca Na-
cional situa na George Madu-
rostraat for di 3or di atardi pa
5or di atardi. Luga pa partici-
pantenan ta limita. Mester yama
528-1500 pa inscribi, muchanan
di 5 aña bay ariba por inscribi pa
participa.

E tayer interesante aki lo ser
presenta pa Sr. Julio Werleman
y tur material inclui ta gratis pa



e muchanan cu ta desea di par-
ticipa. Na final di e tayer riba
e dianan 21, 24 y 25 april 2023
tur fli lo wordo exponi den sala
Diamante pa pueblo por pasa
mira e obranan di e muchanan
durante orario di Biblioteca Na-
cional. Despues di e exposicion
muchanan ta haya e fli pa por
hiba cas.

Comision Celebracion Dianan
Nacional y Ministerio di Cul-
tura ta kere ta importante pa
educa e muchanan riba e cultura

di fli y haciendo esaki den coop-
eracion cu Biblioteca Nacional
lo percura pa educa e muchanan
con ta traha nan propio fli.

Ademas Comision Celebracion
Dianan Nacional ta haci uso di
e oportunidad pa tur organisa-
cion cu tin un evento relaciona
cu dia di Rey 2023 pa manda nos
un e-mail cu e informacion pa e
por wordo publica den e calen-
dario di evento, por manda e in-
formacion riba nos e-mail adres
ccdn@cultura.aw.

Ultimo dia nan pa inscribi bo mes pa participa na e fabuloso workshop di 3D Escultura na Ateliers '89 Punto Di Beyas Arte Aruba

cerka e gran arista Hulandes Maze Boer cuminsando dia 17 di mei 2023



Si miho cos bo por haci! Ta,
manda un e-mail na elvis@ateliers89.org. Y asina inscri-
bi bo mes, pa bo no perde e
portunidad aki! O djies yama
na 5654613!

Pa kiko:

Pa bo siña traha den estilo con-
temporaneo. Creando asina bo
mes un obranan den 3d Escul-
tura.

Pa bo mes crese y desaroya den
bo inspiracion experimentando
hunto pa bo mes un obranan
nobo den un excelente team.
Pa bo compronde y prepara bo
mes pa presenta bo mihor ob-
ranan mas miho cu ta posibel
den e exposicion na final di e
workshop.

Pa bo pasa WAW y muestra tur bo
amigonan bo obranan nobo cu
bo a traha durante e workshop

aki.

Bini y traha cu Maze e mae-
stro y un di e gran artistanan di
Hulanda cu obranan excelente.
Mira aki con mi a gusta y pakiko
e trabounan di Maze. Nan ta
hopi bes directo "in your face",
y ta pone bo pensa di biaha paki-
ko y punta bo mes kiko nan ta.
Manera e cas di mata aki, incredi-
ble mente bon pensa mes.

Lidernan di UE ta cana caminda pa bati na porta di Xi buscando ayudo di China

(AP) — Den e simannan desde cu lider Chines, Xi Jinping a gana un di tres termino di cinco año como presidente, poniendo e na caminda pa keda na poder pa bida largo, lider y diplomaticonan rond di mundo ta canando caminda pa yega na su porta. Ningun mas cu esnan for di Europa.

Presidente Frances, Emmanuel Macron a haci un bishita estatal di perfil halto na Beijing siman pasa compaña pa presidente di Comision Europeo, Ursula von der Leyen, apenas algun dia despues di prome minister Spaño, Pedro Sanchez.

Minister di Exterior Aleman, Annalena Baerbock a yega na e ciudad nort oriental di Tianjin riba diahuebs, siguiendo un bishita di canciyer Olaf Scholz na november. Hefe di politica exterior di UE, Josep Borrell lo tabata na China siman pasa tambe, pero el a test positivo pa Covid-19.

Pa e bloc comercial di 27 nacion, e motibonan pa bay China ta cla. Como aliado di presidente Ruso, Vladimir Putin, Xi por hunga un rol clave den yuda caba cu e guerra na Ucrania. E conflicto a extende pa mas cu un año, impulsa pa prijs di energia y a haci mas daño riba economianan luchando pa recupera for di pandemia di coronavirus. E Europeonan kier ayudo di Xi. Nan kier pa e papia cu presidente di Ucrania como tambe esun di Rusia, pero nan no ta mir'e como e mediador clave. E plan cu China a propone pa Ucrania ta mas tanto un lista di su posicionnan conoci an-



teriormente y ta inaceptable, oficialnan di UE ta bisa.

UE tambe tin miedo cu Xi por suministra armanan na Rusia. Nan ta particularmente preocupa pa e plannan di Putin pa lansa armanan tactico na Belarus. E anuncio aki a yega apenas algun dia despues cu Xi y Putin a reuni pa cementa nan "amistad sin limite."

Baerbock a bisa cu e guerra ta "top di mi agenda." Elogiando Beijing pa alivia tension entre Saudi Arabia y Iran, el a bisa cu "su influencia vis a vis Rusia ta bay tin consecuencia pa henter Europa y pa nos relacion cu China."

Na mes momento, UE ta profundamente preocupa tocante un escalacion militar den Estrecho di Taiwan. China a lansa ehercicionan di guerra net despues cu Macron a bay. Pero a diferencia di Merca, cu su interes strategico y militar na Taiwan, e Europeonan ta mira e isla mas tanto den termino economico y pro-democracia.

Pues e bishitanan tin inten-

cion pa sigura Xi di respeto pa control di Beijing riba henter territorio Chines y pa urgir tranquilidad. Nan tambe ta resalta e reto cu Merca ta enfrenta mientras ta purba di construi un coalicion di pais pa aumenta presion riba Beijing pa motibo di su politicanan expansionsita.

"E clave ta cu nos tin tur interes, tanto na Europa y na China, pa mantene e status quo," un oficial senior di UE a bisa diaranson ultimo, informando reporteronan tocante plannan di e biahe sensitivo di Borrell bao condicion pa no nombr'e. "Esaki a traha bon pa tur banda pa decadas."

Mas leu di geopolitica tin negoshi. UE y China a haci intercambio na balor di mas di 2.3 biyon euro cada dia año pasa, y e Europeonan no kier pone esey na peliger. Sin embargo, e deficit comercial di UE a mas cu triplica durante ultimo decada, y kier pa nivela e campo comercial.

Tambe ta desespera pa limita su importacion di recursonan critico for di China, manera mineralnan poco comun of

componentenan di tecnologia halto, despues di dolorosamente separa su mes di su proveedor di gas mas inconfiable y mas grandi, Rusia. Ta un linea fini pa cana, y China ta experto den politica di dividi-y-conkista.

Durante ultimo dos decada, gobierno Chines a usa su forza economico regularmente pa separa Francia, Alemania y otro aliadonan for di Merca riba asuntonan variando for di seguridad militar y comercio te derechonan humano y Taiwan.

Beijing repetidamente a haci un yamado pa un "mundo multi-polar," un referencia na frustracion Chines cu domino Mericano di asuntonan global y e ambicion di e Partido Comunista den gobierno pa mira e pais bira un lider internacional. "Tin un desviacion serio den comprendemento di Merca y su posicion tocante China, tratando China como e oponente principal y e reto geopolitico di mas grandi," Minister di Exterior di China, Qing Gang a bisa reporteronan luna pasa. "Relacion entre China y Europa no ta enfoca, dependiente y suheto na terceros," el a bisa.

E bishita di Macron a parce di ilustra cu e opinion di Qin no ta djis "wishful thinking." Mientras tension ta aumenta entre Beijing y Washington, e lider Frances a bisa, ta importante pa Europa retene su "autonomia strategico."

"Ta un amigo no ta nifica cu bo mester ta un sirbido," Macron a bisa diaranson, repitiendo un comentario for di su biahe cu a genera alarma entre algun partner Europeo.

"Djis pasobra nos ta aliado, no ta nifica cu nos no tin e derecho pa pensa pa nos mes mas."

Comentarionan asina lo pone presion riba lasonan cu Merca y tambe a expone division dentro di UE. Sin menciona Macron, prome minister Polaco, Mateusz Morawiecki a adverti cu algun na Europa tabata mucho slow pa tende e "wake-up call" pa cu China. "Bo por mira esaki durante ultimo par di siman mientras algun lider Europeo a bay Beijing," Morawiecki a bisa, agregando: "Mi no ta echt comprende e idea di autonomia strategico, si e ta nifica de-facto tira riba nos propio rudia."

Di su banda, Cas Blanco a busca pa bagatelisa e discurso di Macron poniendo Europa como "un polo independiente den un mundo multi-polar." E ta kere cu skepticismo Europeo pa cu Beijing ta aumentando. Oficialnan Mericano ta nota un decision recien di Hulanda pa restringi acceso di China na componentenan di chip di computer avansa, of Scholz publicamente pushando Xi pa no duna arma na Rusia.

A pesar di diferencianan di enfasis nacional, e strategia di UE riba China ta keda hopi manera e tabata na 2019 – e gigante Asiatico ta "un partner, un competidor y rival sistematico." E meta di e bishitanan recien ta pas den e patronchi aki: pa sigura compromiso di Xi pa cu paz, mantene e fluho di comercio husto y reduci e dependencia di Europa riba China pa recursonan critico.



(AP) — Ehercito Sur Koreano ta bisa cu a lansa tiro di advertencia pa rechasa un barco di patrulla Nort Koreano cu temporalmente a crusa e

frontera maritimo occidental den disputa entre e paisnan mientras tabata persigui un barco di pesca Chines.

Sur Korea ta rechasa boto di patrulla Nort Koreano despues di intrusion riba lama

E barco di patrulla Nort Koreano a crusa e asina-yama Linea di Limite Norte pa alrededor di 11am diasabra mientras tabata persigui e barco Chines den awanan cerca di isla Baekryeong di Sur Korea, pero inmediatamente a retira despues cu un barco Sur Koreano a lansa tiro di advertencia, segun Joint Chiefs of Staff Sur Koreano a bisa ayera.

Mientras cu no tabatin inter-

cambio di tiro entre e barconan Nort y Sur Koreano, e barco di velocidad halto di Sur Korea a haya un colision cu e barco Chines mientras tabata responde na e intrusion memey di visibilidad limita, causando golpi y otro herida leve na algun di e mariniernan Sur Koreano.

E Joint Chiefs of Staff a bisa cu ehercito Sur Koreano ta monitoriando actividadnan militar Nort Koreano di cerca

mientras ta prepara pa varios posibilidad di provocacion.

Sur Korea a patrulla e awa rond di e Linea Limite Norte pa decadas despues cu comando di ONU a delinea esaki na e fin di e Guerra Koreano 1950-53. Nort Korea no ta reconoce e linea aki y ta insisti riba un frontera cu ta invadi profundamente den awanan actualmente controla pa e Sur.